

東

華

續

錄

東華續錄

臣周潤蕃恭校

秋七月己酉朔兆惠等奏臣等聞喀什噶爾回人信息卽領兵前進先派額敏和卓之子茂薩等馳往安撫城堡查明地畝據喀什噶爾所屬牌租阿巴特伯克呢雅斯遣回人呈稱六月閒霍集占遣人告知布拉呢敦將葉爾羌喀什噶爾城堡焚毀令回人等遷往巴達克山我卽閉城拒守聞霍集占兄弟約於色喀庫勒之齊里麥巴蘇相會若兵至卽可擒獲等語臣一面檄知布魯特納喇巴圖等截賊人前往色喀庫勒投霍罕額爾德尼伯克之路一面儘力尾追報聞○辛亥吏部議奏兩江總督尹繼善江蘇巡撫陳宏謀督捕飛蝗不力應分別降革得旨捕蝗爲地方要務該督撫

自應嚴飭屬員實力查辦是以處分定例綦嚴從前直隸捕蝗案
內部議將方觀承擬以降三級調用經朕降旨改爲革職留任此
案該尹繼善統轄三省地方遼闊或有查察未周之處著從寬仍
依部議照方觀承例降三級調用准其抵銷至該撫陳宏謀境內
遇有飛蝗督捕乃其專責且海州一帶距蘇州不遠屬員撲捕不
力豈竟漫無覺察何以並不查參又未親身往捕非尋常徇庇可
比著革去總督銜照部議革職留巡撫任○王子 上奉 皇太
后啓鑾秋獮木蘭○免經過地方本年額賦十分之三○丙辰諭
昨據鑲黃旗滿洲都統以素王承襲散秩大臣具奏朕因此等承
襲散秩大臣都統昔昔有之令將見在八旗內統計幾缺俱係何
人承襲之處查奏茲據軍機大臣等查覆八旗共有世襲散秩大
臣三員都統四員散秩大臣三缺見各承襲其都統四缺停襲並

將伊等世襲緣由及停襲之處一併具奏查伊等俱因著有勳績

太祖

太宗特加恩賞給世職用昭懋典今伊等子孫或緣事

停襲或因都統有辦事之責停襲於國家酬庸之道未合朕心不

忍著加恩將石廷柱墨爾根轄之都統俱作爲散秩大臣令伊等

子孫承襲再土默特古祿格楚琥爾之都統與杭高之都統無異

今杭高之都統旣賞給男爵世襲古祿格楚琥爾亦著照此賞給

令伊養子子爵扎什泰兼襲著傳諭八旗以示朕軫念勤舊特沛

恩施至意○丁巳兆惠等奏臣等領兵前往喀什噶爾沿途經過

村莊回眾皆獻牛酒果餌情詞恭順又被脅脫出之回人等俱稱

霍集占由伯克和羅木渡口向羌呼勒逃去布拉呢敦由玉魯克

領潛逃兄弟會齊同行同黨止四千餘人等語臣等抵喀什噶爾

後加以撫慰詢知布拉呢敦兄弟相會後同向色喀庫勒逃走雖

均係巴達克山必由之路但甚險遠伊等或往巴達克山附近之
博羅爾或仍往安集延瑪爾噶朗霍罕納木干等處皆未可定查
色喀庫勒附近之帕密勒西通博羅爾巴達克山北通安集延等
處應於此堵擊行程不過十數日臣等已知會阿里衮巴祿之兵
前來協助臣明瑞愛隆阿溫布等卽領兵二千追襲其餘兵馬暫
爲休息臣兆惠一面將撫定喀什噶爾葉爾羌查叢戶口田賦委
員派兵防守各事宜辦理就緒卽領兵策應富德等奏臣等由固
瑞薩納珠前進據索倫總管薩壘等獲回人伊巴哩野木等告稱
霍集占棄葉爾羌逃往英吉沙爾大小伯克等情願迎降臣一面
派兵五百名令鄂博什等持檄往諭爲首之喀瑪勒和卓等一面
帶兵前往沿途回人扶老攜幼道左跪迎行至聽雜阿布河岸鄂
博什等將檄傳之喀瑪勒和卓等帶來投降臣等進兵渡河入城

撫慰回眾令各安生業查明見存戶口二萬餘復詢霍集占逃走所向僉稱或往巴達克山或往安集延不知確實等語臣等務期追獲諭軍機大臣等據將軍兆惠噶爾德等奏稱逆賊霍集占兄弟聞大兵前進率其親黨逃竄葉爾羌喀什噶爾兩城回眾俱輪忙歸順見在一面安撫兩城一面派兵追剿等語覽奏深爲欣慰逆賊兄弟雖畏罪先逃而兩大城實回部著名之地旣歡迎恐後則二賊亦可計日就擒此皆將軍大臣官兵等奮勇所致甚屬可嘉俱著交部議敘○己未 上奉 皇太后駐蹕避暑山莊○諭軍機大臣等舒赫德等奏稱阿克蘇係回部大城村莊甚多舊係伯克密剝布管理今雖不必準以內地官制而品級職掌宜爲釐定庶足以辨等威而昭信守等語所奏甚是著照所請以阿奇木伯克爲三品伊什罕伯克爲四品噶爾納齊伯克爲五品將應升人

員奏請補授其小伯克密喇布等爲六七品俟缺出揀選補授其餘各城俱一體辦理但回部諸城皆大兵廵勦所定非哈密吐魯番之向化歸誠可比從前玉素布額敏和卓之屬人等本係世僕故所設官員俱不支俸此等回人雖承辦公事有官職大小之殊皆係朕之臣僕將來如阿奇木等大伯克或令其輪班入覲酌給官俸其小伯克等或於所定租賦內通融支給亦可著傳諭舒赫德查覈定議具奏俟回部全定後舉行此時不妨以籌辦大槩曉示回人俾共知感激奮勉○庚申諭上年降旨令八旗三品以上大臣有子弟應試者自行奏明方准入闈特因旗童在場喧譁滋事是以爲伊父兄示之節制俾知樂實黜浮破除積習非槩從禁止遏其進取之途也乃今年鄉試屆期伊等既不遵旨自奏禮部又爲含糊具請似此巧爲嘗試將使故智益萌伊於胡底我八旗

醇樸素風嫋國語習騎射其人果有足錄均可量能擢用若科目者特備備材一格耳今乃盡心詭遇又從而釣弋其名淵藏其弊是以國家啓迪後生之途轉爲壘壞人材之具可乎且我朝開國以來名臣碩輔莫不志秉忠貞才優韜略初非從事佔畢者卽仕躋大僚內而大學士尙書外而總督巡撫勳名氣節指不勝屈大約皆非出於甲乙兩榜卽近時大臣在科第中有名者不過如鄂爾泰尹繼善二二人而已然其見用實以其心地才幹初不以其文也其他倖列科名而名實不副者亦指不勝屈若率覩國柱者流以滿洲本色論之皆不能至驍騎校者而乃託名斯文平日又不肯潛心力學惟事希心襲取視爲功名捷徑甚至懷挾夾帶無弊不作卽立法嚴行搜檢而所派大臣非親卽故俗稱官官相護亦復有名無實此所關於風俗人心者甚鉅朕安得不力爲振刷

以挽頽風伊等至此尙不思痛自湔改一似蠶身入闈即可僥倖
萬一勢必欲朕盡停旗人鄉會試而後已乎所有禮部單開不循
例自察遞任子弟冊送考試之尹繼善等著將該部及該旗會否
鈔錄前奉諭旨行文知會伊等之處令該部旗及伊等本人據實
明白回奏再行降旨至僧保住福延乃係內務府人員進身豈應
無階而亦令子弟驚名科舉又顯違旨不奏尤爲庸妄著將僧保
住福延革職並將伊子弟革去生監在內務府庫使筆帖式上效
力行走不准給俸俟五年無過該管官奏明另請挑差其蒙混奏
請之禮部掌官伍齡安等著交部嚴察叢威○甲子以王鳴盛爲
內閣學士由翰林院侍郎學士遷○丁卯直隸總督方觀承議覆御史李宜
青條奏疏潛水源一疏查畿輔水利仰蒙世宗憲皇帝大發帑
金設東西南北四局分路營治皇上復裕頒經費舉行勅二三

次工程臣每歲稽查修濬期無壅廢聞有一泉初出立予疏治如
滿城之申泉邢臺之鴻泉達活泉野狐泉百泉雖所溉廣狹不同
未嘗任其屬塞至所稱宋臣何承矩於雄鄭霸州順安等處興堰
六百里引淀灌注民賴其利等語查今之東西二淀卽其遺蹟六
百里堰卽今千里長堤淀爲畿南北眾水所匯崇堤屹立惟防水
溢蓋淀高而城邑皆下儻泥往蹟引漑灌田害將莫救此今昔情
形之有異也如就淀言利則三百餘里中水村鱗比產物不可勝
紀一畝之地一屋之基以數十金論值民賴其利視昔加饒然當
歲旱則雖蒲草亦失其長養之常江浙澤國水多於地亦不免以
旱告是雖有陂池之潤不足當雨澤之施惟遇旱而求通雨澤於
水土之氣則人事有當盡者耳至所奏村莊道路開挖溝渠等款
臣前奏明於農隙酌量情形隨時籌辦應毋庸再議下部知之

庚午兆惠等奏臣等撫定喀什噶爾等二城凡投順者俱行免罪
又查出各城遷來回眾二千五百餘戶俱送往阿克蘇以備屯田
謹陳喀什噶爾設官定職徵糧鑄錢及駐兵分防各事宜查喀什
噶爾地居西北距肅州嘉峪關六千餘里東界烏什阿克蘇西界
安集延布魯特南界葉爾羌北界布魯特總計大小十城七村莊
一萬六千餘戶數十萬餘口各城村辦事應設官職查回部頭
目曰阿奇木總理一城曰伊什罕協辦阿奇木事曰商伯克管理
租賦曰哈子管理刑名曰密喇布管理水利曰訥克布管理匠役
曰帕察沙布查拏賊盜曰茂特色布承辦經教曰木特幹里管理
田宅曰都管管理館驛曰巴濟格爾管理稅課曰阿爾巴布派差
催課曰市琿協辦都管事曰巴克邁塔爾專管園林曰明伯克其
職如于總今喀什噶爾阿奇木一缺請暫委吐魯番副台吉茂薩

署理其餘各職臣等查隨營效力之著姓回人及並未從逆之回人子孫等三十四人揀選補授一每年貢賦數目查回人一帕特瑪準官石四石五斗一噶勒布爾準五斗一察喇克準官秤十斤一騰格準制錢五十文值銀一兩噶爾丹策零時定額每年納錢六萬七千腦格此內有種地之鄂爾托什人等納糧四萬八百九十八帕特瑪棉花一千四百六十三察喇克紅花三百六十五察喇克共折錢二萬一千餘腦格又克色克綽克巴什人等納錢二萬六千騰格商賈牧養人等納錢二萬騰格皆以本色折納此外又有商人金銅稅園戶果稅邊界貿易回人徵稅十分之一外來貿易之人徵二十分之一每歲俱未能如數交納臣等酌量減賦歲徵糧四千帕特瑪錢六千騰格棉花紅花照舊輸納作爲一千賦稅俟將來駐兵興否再行酌交糧石銀兩金十兩葡萄千斤解

交內府其餘零星雜稅槩行蠲免惟貿易稅課仍舊辦理一大兵進剿應籌糧餉查各城村見種田禾按照籽種計算豐年可收七八倍卽荒年亦可二三倍但各處值驚擾之餘自應量爲減徵共交糧二千帕特瑪其隨逆回逃竄之人田畝入官充餉令三倍交納共一千二百帕特瑪又應交錢一萬三千餘脢格俱折收糧石舊果園七所歲徵葡萄令藏乾入貢布拉呢敦新果園十三所所獲無多卽充官兵賞賚之用一回部錢文應行改鑄查回錢俱紅銅鼓鑄計重二錢一面鑄準噶爾台吉之名一面鑄回字因所產銅少每以新錢一文易舊錢二文銷毀更鑄今雖未便全收改鑄見有鑄破銅七千餘斤請先鑄錢五十餘萬文換回舊錢另鑄或照內地制錢每一文重一錢二分或卽照回錢體質一面鑄乾隆通寶漢字一面鑄葉爾羌清文及回字並呈樣詔旨酌定一見在

分路進兵擒賊其喀什噶爾應酌量駐防擺派西安滿兵三百名
阿拉善兵五千餘名委散秩大臣伯永慶阿拉善公袞楚克管理
仍留綠旗兵一千五百餘名委提督閭相師酌於城鄉邊界駐防
臣一面前往葉爾羌查辦其和闐阿克蘇等處情形不同已行文
舒赫德辦理從之○諭親王達瓦齊曾爲厄魯特台吉被獲獻俘
朕念係外藩宥罪錫爵伊自受恩以來隨從禁近一意抒忱奮勉
爲人尚屬樸誠今聞溘逝深爲軫惻著賞給治喪銀一千兩伊子
羅布扎仍准其襲封郡王○辛未永定河漫口合龍○乙亥 御
製納穆扎爾三泰雙義詩勒石葉爾羌○先是陝甘總督楊應琚
奏西陲平定幅員廣大陝西甘肅非一總督所能兼理請將西安
總督改爲川陝總督四川總督改爲四川巡撫甘肅巡撫改爲甘
肅總督管巡撫事安西柳溝沙州靖逆赤金五衛裁汰於安西設

一府安西柳溝二衛改設一縣並駐安西靖逆赤金二衛改設一縣駐靖逆沙州衛改設一縣駐沙州安西道移駐哈密安西同知移駐巴里坤靖逆通判移駐哈密俱令管理糧餉兼辦地方事務歸安西道統屬下部議至是議上得旨開泰著補放川陝總督仍駐紮四川令其往來西安稽查一應事務楊應琚著補放甘肅總督陝西提鎮營務並聽甘肅總督節制其甘肅提鎮營務川陝總督不必節制餘依議

八月己卯諭據參贊大臣毅勇公明瑞奏稱追勦逆回於霍斯庫魯克嶺賊眾六千負嵎固守時我兵到者九百人整陣奮勇廝戰經歷三時賊眾大敗尋復恃其馬力前來抗拒我兵直前擊勦賊眾越嶺逃竄此次打仗我兵陣斬逆賊五百餘人生擒男婦三十餘名受傷遁走者無算計獲駝馬牲畜百餘隻等語覽奏我師以

專敵眾力戰敗賊實屬奮勇效力朕心甚爲嘉悅明瑞著交部從優議敘所有在伊隊內之大臣侍衛官兵等並著明瑞查明造冊送部議敘○論軍機大臣等富德奏與阿里袞明瑞三隊官兵業經會合揀選四千人往追逆回其存留之兵交楊甯管束招降沙爾呼勒回人以候調遣等語此奏未至之前朕因明瑞官兵較少賊勢尙眾頗屢於懷今旣三隊會合兵力倍增如此應機赴節乃上天垂佑必獲渠魁之兆佢聞伊等捷音至嚮導等所云巴達克山交界有隘口數十里僅容一騎又隔大河止一渡口等語萬一賊人脫逃得入巴達克山必不得已卽遵前旨撤兵回葉爾羌喀什噶爾休息次年再行進剿亦可然終以此時獲賊爲上其各加意奮勉○乙酉命四川松茂建昌二道加水利銜○庚寅命德州衛民塏歸地方官管轄○壬辰諭軍機大臣等富德等奏稱追

及逆酋霍集占於阿勒楚爾我兵奪山衝擊陣斬賊眾千餘人
擒五十餘人獲礮礮器械牲隻無算賊眾大敗窮竄見在乘勝悉
力追擒等語大臣官兵等爭先奮勇力勦逆回覽奏深爲嘉慰仰
賴 上蒼福佑逆酋計日就擒可立待伊等捷音也其自將軍至
領隊大臣俱交部從優議敘侍衛官兵及陣亡得傷人等俱著查
明造冊送部議敘議卹○命甘肅明底借給籽種口糧例外酌增
折價○癸巳 上奉 皇太后自避暑山莊巡幸木蘭行圍○庚
子富德等奏臣等敗賊於阿勒楚爾乘勢追勦行至葉什勒庫勒
諾爾詢悉巴達克山界山足有路僅容單騎過一大嶺與巴達克
山之村莊相近其北大山內亦有一路可通巴達克山安集延等
處臣等尾隨賊蹤乘其未入別部落先行分路堵截適賊眾先據
山麓遂領兵向前衝擊並一面樹纛招降其大伯克等率回眾投

該逆賊噶爾占猶在山頭攔阻而降者益多共計收獲賊眾一萬二千餘人軍器二千餘件駝驥牛羊萬餘隻逆賊兄弟以餘黨四五百人竄入巴達克山臣等酌留公鄂對散秩大臣阿什默特並侍衛兵丁等管束降回臣阿里袞帶兵追賊噶爾德巴祿阿桂等隨後策應並先行曉諭巴達克山部落人等令將逆賊縛獻報聞○兆惠等奏臣等查葉爾羌所屬二十七城村計三萬戶十萬餘口前噶爾丹策零時每年貢賦交納十萬兩格此外有金稅貿易段布莊隻等稅雖按則徵收而全完者少噶爾占入城額外科斂及逃竄時又行搶掠回人生計甚艱察看情形與喀什噶爾不同見於本年七月起止交雜糧一千四百帕特瑪各項謀生人等交一萬二千兩格此後應如何徵收之處俟辛巳年再行定議餘照喀什噶爾之例其隨賊逃竄人等已種地畝與房屋園林一併交收入

官至葉爾羌大伯克等存者甚少見在惟授爲密喇布之托克托和卓人尙奮勉和什克伯克舊爲葉爾羌等城阿奇木伊叔素賈瑞亦久爲商伯克臣等公議將和什克伯克署理葉爾羌阿奇木事務素賈瑞辦理商伯克事務得旨如所請行○辛丑富德等奏臣明瑞哈達哈等領兵在巴達克山北堵截賊人逃路派副都統伊柱等策應有賊前來衝突詢之降回等云此卽厄魯特沙喇斯瑪呼斯臣等帶兵追勦殲賊二百餘人尙存賊四百餘勢不能支有宰桑雅瑞得木齊丹巴來投查沙喇斯瑪呼斯怙惡難逭臣等暫爲撫納俟追賊事竣再行查明正法報聞○癸卯諭軍機大臣等富德奏據巴達克山部落人等告稱霍集占搶掠伊等牲隻欲逃他處其言更不可信賊人逃入伊等境內必且哀乞容留何敢加以騷擾看來伊等早與賊通不過令其潛匿耳至賊人去已三

日前路有大戈壁等語特欲懈我急迫之心否則賊人掣其家口行李廝較追兵逼滯何以迅速若此又求我兵稍爲遠駐俱屬欺飾之詞卽如從前阿睦爾撒納入俄羅斯森博羅特圖喇旣已送交伊頭目尙以滿楚爲詞與此等情節相似再所得降人萬餘若盡收其馬匹不但益我軍資亦可消其妄動之念或巴達克山稍有推諉又可整兵進取總之先難後獲事理之常此時殊爲庶念見在辦理情形若何作速奏聞○丁未諭軍機大臣等據富德奏稱伯克霍集斯之兄弟諸子多爲霍集占戕害深可憫惻伊此次亦屬奮勉自效著加恩晉封貝勒仍賞段十端富德等卽傳諭撫慰

九月戊申朔命山西災賑口糧例外酌增折價○辛亥晉封回人鄂對爲貝子阿什默特噶岱默特爲公餘各升賞有差○王子諭

軍機大臣等富德等奏稱巴達克山亥都村伯克沙莽蘇爾等遣人告稱霍集占兄弟所領約三四百人搶掠經過伊等會集四十人尾追霍集占等且戰且走高呼云我係回部之汗前往默特禮佛並不曾擾累爾等爲何追掠等語此言果實則富德等前此愈宣窮追卽如賊眾三四百人家口在其內巴達克山人等卽已追及我兵豈獨不能至調不曾擾累則伊等前所云賊人入境搶掠牲隻因登山避匿與此次所告不符亦當詳加詰問且逆賊等高呼前往默特亦係枝梧之語默特地方在布哈爾果欲前往亦何必豫爲宣播細覈情詞顯係伊部落容留戚眾飾詞欺誑意圖漸息事端富德等當必不爲所惑總以來年進兵爲要俟將軍等回程時再降諭旨此諭卽作速覆奏○癸丑諭軍機大臣等努三奏稱博克達山在烏嚕木齊之東爲西陲重鎮前年將軍兆惠於

察罕郭勒曾經致祭嗣後未見舉行請頒祭文香帛令駐紮大臣每年春季於烏嚕木齊之巴爾哈達致祭等語所奏甚是著照所請行除祭文香帛由內頒發交該處駐紮大臣敬謹致祭外其所用犧牲品物卽於該處虔辦著爲例嗣於是年定額林哈畢爾噶山祀典二十五年定穆素爾山格登山伊犁河祀典二十六年定博羅圖山祀典二十八年定阿布喇勒山塔勒奇山洪郭爾鄂博阿勒坦額默勒山察罕賽哩木諾爾崆吉斯河哈什河察罕烏蘇阿里瑪圖河策集河薩瑪勒河奎屯河祀典三十一年定塔爾巴哈台山巴爾魯克山額彬格遜諾爾裕勒雅爾河阿拉克圖古勒諾爾額敏河祀典均歲以春秋致祭○設湖南永綏廳學○甲寅楊繼緒以不職休致以阿永阿爲陝西按察使○丁巳富德等奏巴達克山亥都村伯克沙莽蘇爾來見據稱霍集占逃入伯克沙

穆爾遊牧臣等因令追擒勒限回報又據沙穆爾來人賽特多羅特告稱巴達克山汗兒調沙穆爾協勦霍集占並云素勒坦沙汗在阿勒渾楚哈嶺遇霍集占交戰霍集占退住齊納爾小河其地通布哈爾薩瑪爾罕鄂漢等三處此時未知擒獲否臣等諭以速行擒獻先派哨探兵與伊等同行隨令副都統伊住巴圖濟爾噶勒領兵前往諭軍機大臣等覽富德奏沙穆爾來人所告巴達克山素勒坦沙追襲霍集占情形設當日派兵窮追賊已早獲此時巴達克山若尚未將逆賊擒獻富德等既撤兵轉回來年再行進兵亦仍是伊等前往總之道路遙遠朕雖多方指示亦已後時伊等惟當應機速辦耳○庚申 上奉 皇太后駐蹕避暑山莊○
諭軍機大臣等從前德舒奏稱由阿克蘇解來回人於途次被瑪哈沁搶掠已領兵追捕今永貴奏伊來京時行至庫車據都司舒

明阿等報稱德舒行至賽哩木之阿勒坦和碩遇厄魯特百餘殺傷官兵德舒中槍身故卽行文舒赫德選兵三四百名前來伊帶領搜勦等語德舒本未諳練營伍而所領之兵又復無用朕前已慮及命努三前往協助今竟爲賊害雖非禦敵捐軀可比究屬歿於國事深可憫惻著加恩照陣亡例交部議卽永貴雖調阿克蘇之兵恐亦係裁汰所餘著仍駐賽哩木候努三同進如努三未到卽差人往促若馬匹不敷卽於解送軍營之一千馬內酌量帶往務將爲首之賊解京嚴懲或臨陣勦殺亦必盡殲逆黨前據德舒等奏請歸併臺站原以防備盜賊但伊等旣經領兵搜捕著照舊分設以速郵遞○諭玉素布自駐禁烏什以來辦理諸事實心報效著加恩晉封爲貝勒○兆惠等奏前因堵截逆賊等逃路遣侍衛達克塔納等傳檄霍罕額爾德尼伯克瑪爾噶朗安集延納木

千等城並布魯特之額德格訥等部落茲據額德格訥之阿濟畢
遣沙喇庫楚克等來呈稱額德格訥阿濟畢與霍罕額爾德尼伯
克俱同心歸順並齋呈阿濟畢之書譯文曰謹呈如天普覆廣大
無外如愛養眾生素賚瑞佛之鴻仁如古伊斯干達哩之神威如
嚕斯塔木天下無敵之大勇富有四海乾隆 大皇帝欽命將軍
軍前額德格訥布魯特小臣阿濟畢恭祝 大皇帝萬萬壽今奉
到將軍傳諭我等情願投誠布哈爾以東我等二十一萬人皆爲
臣僕等語臣等授以答書分別賞給仍勉其協力勦賊得旨覽兆
惠奏阿濟畢額爾德尼俱恭順可嘉著頒給敕書賜以段匹荷包
伊等若遣使入覲卽辦理伴送來京敕書曰將軍兆惠等奏稱侍
衛達克塔納等至安集延霍罕見阿濟畢額爾德尼伯克俱誠心
內附情詞肫懇朕深嘉悅朕爲天下共主內外一體凡向化來歸

者皆加以撫育各順其道以安生理爾等如願入觀即可前來或
遣子弟屬人代行亦一體加以恩賞茲以路遙不能多齋賜物賞
綵段各二端大小荷包各一對爾等尙其約束所部永享昇平之
福特諭○辛酉定道府六年引見例○癸亥 上奉 皇太后自

避暑山莊回鑾○諭朕閱浙江省秋審招冊有項昌假官一案內

僞造憑照誘賣之王星瞻已經擬斬而受買項昌之童汝德僅止
擬軍情罪尙未允協大小官職均屬朝廷名器此而可假豈尋常
捏冒行私射利作奸可比其在設計誘騙者固屬法無可逭至受
買之犯膽敢知情頂冒徑行謁見上官其弁髦王章不巳甚耶卽
使新選典史童汝鵬實在中途病故該犯居然張冠李戴冒其名
而赴任非假官而何尤天化日之下豈容假官儼居民上其情較
之設局騙財者更可惡也且律內行賄得贓諸案並屬與受同科

今乃以名器攸關似此妄行藐法者反得曲分軒輊可乎此案王
星瞻係按律定擬而童汝德擬軍又係用例例者正所以上下其
手之捷徑也其如何準情定罪使權衡悉當不失名例本意著刑
部詳悉定議具奏本案童汝德並著另行定議具奏○乙丑諭昨
因浙江省秋審招冊內假官案犯童汝德情罪未協已降旨交部
另行定議隨檢閱本律原文益知此案比擬失倫乃用律者之過
非律之自有疑義也律文云凡詐假官假與人官者斬等語其義
可謂櫛括明切乃自律註日增而律意轉晦司讞者因註語而誤
會本律又展轉而引用他例遂致强生枝節輕重懸殊卽如詐假
官者卽童汝德也假與人官者卽王星瞻也今一事兩歧皆因例
註滋繁轉易啓文吏奸胥高下其手之弊當綱紀肅清之時內外
問刑官或不敢假借營私逞其伎倆而由此科條疑似使不肖者

得因緣爲奸正復不少其所關於王章民命者甚鉅然同一假官
其中情狀亦自不同有假充頂帶止圖爲鄉里光榮者有冒稱職
官而意在圖騙一人圖行一事者並有敢冒官赴任欲臨民用事
如童汝德之藐視憲典者若非分別等差精研釐正則當輕而稍
重如民命何當重而稍輕如王章何其非弼教協中之義均也朕
矜慎庶獄務在鑑空衡平從不設畸重畸輕之見必使扞法之徒
一一適如其所自取然後罪情無枉而國法不撓稱物平施悉歸
明允所有本條內應行悉心酌議俾較然壹一之處刑部一併分
別定議具奏尋議凡僞造憑札自爲假官或將有故官員憑札賣
與他人及買受憑札冒名赴任者俱擬斬監候無官詐稱有官或
冒見任官員姓名並未造有憑札止於圖騙一人圖行一事犯該
徒罪以下發邊衛充軍犯該軍流遣罪擬絞監候若假冒職官止

圖鄉里光榮無所求爲亦無憑札者杖六十徒一年至浙江假官案犯童汝德頂冒赴任應依律改擬斬監候本省秋審已過請卽行正法從之○丙寅改甘肅安西鎮爲安西府安西柳溝二衛爲淵泉縣靖逆赤金二衛爲玉門縣沙州衛爲敦煌縣○己巳 上

奉 皇太后還京師○庚午碩色因病解任以蘇昌爲湖廣總督海明爲吏部侍郎赫赫爲內閣學士由副都統陞○甲戌諭軍機大臣

等回城見俱平定應將霍集占等私行徵斂之項嚴行禁止卽辦事之阿奇木等員亦應如各省大臣之例遇缺補授或緣事革退則開缺另補至於霍集占族戚等所以留住京師並令伯克霍集斯等俟撤兵時同來者因恐伊等若仍居舊地必妄生希冀致啓釁端此正所以保全之道兆惠等此時宜曲加撫慰不可稍有端洩俟霍集斯到京後卽曉示各城回人以中外一家惟知其主阿

奇木伯克不過辦事大員毋許自稱諾顏私收貢賦卽阿奇木等
缺出亦揀選賢員或以伊什罕升補不准世襲章程既定則伊等
希冀之念自消庶地方可以甯謐著因便密諭兆惠舒赫德遵照
辦理○諭福祿等奏詳查和闐六城回人共一萬三千一百四十一
三戶四萬一千二百八十六口較齊凌扎布等原查數目缺五千
四百五十七戶三萬一千二百五十七口等語齊凌扎布等原查
數目本未確實而後來被圍數月或不免傷損抑係回人等圖貢
賦輕減隱匿脫漏亦未可定今若有人首告自不便顧預否則不
必究問著傳諭舒赫德等此時且以停止查辦爲妥若日後自行
敗露亦無難再辦也○命參贊大臣阿里袞留駐葉爾羌○乙亥
命五城平耀麥豆○命莊浪土司屬戶籽種口糧改給本色並免
追舊欠○丁丑諭將軍兆惠富德等先後奏報大兵追勦逆賊霍

集占布拉呢敦抵巴達克山界其部長素勒坦沙告稱還將軍大人諭邀擊二賊見已槍斃霍集占生擒布拉呢敦所差侍衛薩穆坦俱經目覩但回部信奉經典從無自擒族類轉送與人之理若竟呈獻天朝恐別部落必來滋事是以求免等語已傳諭兆惠富德等令卽剋期勒兵向索且曉譬順逆以該部落既知歸誠內屬理應獻賦自效卽以回部舊俗不自相戕爲詞則已不應有生擒槍斃之舉况慮他日諸部之滋事較此時天朝大兵之壓境其利害尤爲明白易曉如果該部落卽日遵諭獻出則虜功自可告竣而庸懦無識之徒或以諸城悉定各部款降似此攀榮通賊何必更事窮追致滋勞費殊不知用兵回部原非朕之本意當伊犁平定準噶爾悉入版圖而東西布魯特左右哈薩克等無不傾心向化何有於花門雜種而必欲爲窮兵艱武之事實以逆賊兄弟貢

恩反噬不得不明正其罪以彰撻伐今葉爾羌喀什噶爾均就撫
綏設官定賦其於回部大局固已全定獨逆賊兄弟尙未懸首
銜此皆從前雅爾哈善玩寇僥幸於攻圍庫車時使已投羅網之
逆擊復得遠颺蹉跎展轉以至今日實爲此事罪魁自兆惠富德
統兵以來埽其巢穴分路進剿屢獲全勝獨惜富德等兵至葉什
勒庫勒諾爾其時逆賊疲憊已甚卽謂我軍馬力稍乏若乘勢精
選數百騎緊躡其後即可直抵巴達克山協同捕獲何致該部落
得以藉口此亦因富德等俘獲眾多其氣不無稍懈而明瑞在京
時朕曾諭以臨陣須當慎重遂致誤會未免少爲徘徊耳然此時
大軍方駐彼地不過貢其餘勇即可集事又何所增其勞費若意
在苟且遷就遽欲貢諛稱賀謂可息事甯人則朕斷斷不爲也如
前此阿睦爾撒納已伏冥誅並遣大臣驗實因逆屍究未獻出朕

卽不肯告廟受賀以爲自欺欺人之計此內外諸臣所共知者况堂堂大清兵力全盛而回部之賦稅屯田之收穫以及沿途貿易城倉積貯儲胥充裕不獨內地毫無飛輶饋運之勞而陝甘兩省蠲賑之恩有加無已閭閻初不知有軍興徵發豈漢唐宋明諸代疲中國之財力而不能得地尺寸者可比今統計用兵不越五年而西陲萬餘里城無不下眾無不降此時仰荷上蒼福佑得以奏茲偉績而人事之因時順應尤不可不善以承之也我滿洲風尚素稱醇樸勇往而承平日久八旗子弟多耽安逸偶遇軍旅之事轉致不能嫓習朕於此舉正欲訓誨督率之俾習勤勞而諳韜略而諸臣中或猶有狃於小利近功不知事機之緩急者古者無事之時不廢訓戎講武今以法無可追之逆酉當功有必成之事會且可藉以練我殺敵致果之將材又何所顧慮而竟爲浮論

所惑急圖完局貽笑方來也不然則佳兵之誠朕念之熟矣豈尙存好大喜功之見以耀兵威而勤遠略耶著將此宣諭中外知之
○敕諭巴達克山汗素勒坦沙曰據將軍富德等奏爾奉將軍檄文擒拏逆賊霍集占布拉呢敦異見恭順聞霍集占受傷身故布拉呢敦見在拘禁爾復遣鄂穆爾拜同侍衛等前來以爾等經典擒獲派噶木巴爾子孫不便呈獻致別部落興戎將軍大臣等以霍集占等罪惡再行曉示若不呈獻卽日進兵朕爲天下共主內外一體咸加撫育况爾慕化歸誠深用嘉悅惟是霍集占兄弟前爲準噶爾拘禁因大兵平定伊犁釋其囚繫俾居故地自應感激圖報乃負恩背義反將所遣大臣官兵盡行戕害是以興師問罪復敢聚黨抗命肆虐無辜強奪婦女與爾等經教大相背戾眾怨沸騰今年大兵進剿葉爾羌喀什噶爾等城咸思歸附一賊恐被

納獻先率其黨與跳身遠遁然逆徒數萬直抵巴達克山雖不敢抗我軍威實足據爾土地我大兵撫定各城卽行追襲勦殺無算乞降者萬餘人僅存餘孽以入爾境將軍大臣等非不能窮追直入實體朕好生之心不忍擾害無罪部落朕亦屢諭將軍等暫停師旅故逆賊等未卽就擒今爾乃以阿璋摩羅離心及別部落啞爲詞此等情事縱實尙屬未然今大兵壓境卽暫時休息來年必兵馬雲集斯時誰能相助此中利害之重輕自宜熟計至我大國兵力爾等當亦聞知卽平定準噶爾由於傳說若收服葉爾羌喀什噶爾逆賊數萬眾望風奔竄乃爾等目覩者爾素勒坦沙宣中有定見勿惑人言將駐集占之屍與布拉呢敦送至軍前朕必厚加恩賞但爾如果已勦擒霍集占等又何惜而不獻其爲爾部落留養節詞以對情節顯然此等語將軍大臣尙不受爾欺矧敢

於朕前支節耶此時惟悔悟縛獻則前事皆可不論今因降敕賜爾鑄段色段各二端爾其深思熟計以享無窮之福特論○開黃河南岸儀封十三堡引渠

冬十月己卯封回人額色尹爲公以瑪木特爲扎薩克頭等台吉餘各加秩有差○丁亥諭用兵爲國家要務賞罰必期明允爲將軍者於一切軍務果能奮往直前身親戰陣何事不可成就此內卽稍有見識未到者朕亦必加曲諒若如雅爾哈善等在庫車圍困霍集占使伊等嚴加防守逆賊安能出走且早已竣事乃伊等並不親臨嚴飭轉似特開一路令其脫逃有此情理乎故將雅爾哈善拏問卽行正法參贊大臣乃協同將軍辦事之人將軍恩慮所未及參贊卽應指陳若不見聽卽應參奏哈甯阿爲雅爾哈善之參贊解到時亦應正法但參贊職任較將軍究稍有閒是以將

伊擬斬監候揆之以理此次秋審哈甯阿卽宜予句因念伊父哈達哈見在軍前若有分外效力之處尚可稍存寬宥昨富德等領兵至巴達克山交界遣使索取置集占當遣額勒登額時達爾黨阿哈達哈豈不宜告請前往與其遣額勒登額何如伊等一行之爲愈哉况伊等皆獲罪之人朕加恩復用爲侍衛道往效力不但當感激朕恩卽伊自計亦當奮勉乃竟以侍衛自居與眾爲伍不知愧恥實出意料之外此等大關繫處俱未計及哈甯阿豈尚可曲宥耶但朕念費英東扎爾固齊不忍將伊孫同眾犯棄市特加恩令哈甯阿自盡著曉諭哈達哈及軍營大臣官兵等知之○癸巳免助馬口莊頭本年旱災額賦十分之七○甲午申禁燒鍋礮

翹○乙未山西巡撫塔爾卒子祭○以鄂弼爲山西巡撫由副都統

遷○丁酉諭軍機大臣等前軍機大臣會同刑部定議將減死還

遣之犯改發巴里坤一帶地方安插原因此等人犯情罪本重國家特推法外之仁俾得屏居賓閒力耕自給而內地穰秀擴清物力亦不虞坐耗乃定法伊始該犯等尙敢悍然藐法中途潛逃其罪更何可逭已飭總督楊應琚巡撫鍾音等令其卽行按律正法示眾以昭懲創第念此等造犯俱由各省改發一時狡計免脫未必不仍回原處若僅令陝甘兩省官吏嚴行捕治仍屬未周著傳諭各督撫等通飭所屬責力訪查如有竄回本地者一經緝獲卽慎選員役押解赴甘令其酌量原犯重輕分別處治俾共知儆惕各督撫等身爲大臣於國計民生所見當存遠大務宜破除一切姑息目前之陋習使定制可以永久試思國家承平百有餘年民生不見兵革休養滋息於古罕有倫比而天地生財止有此數生齒漸繁則食貨漸貴比歲民數穀數奏牘牒然朕宵旰勤求每懷

堯舜猶病之歟今幸邊陲式廓萬有餘里地利方興以新闢之土
疆佐中原之耕鑿而又化兇頑之敗類爲務本之良民所謂一舉
而數善備焉者孰大於是儻復不知大體惟以縱釋有罪爲仁是
終使良法不行而奸徒漏網益眾豈朕期望封疆大吏之至憲乎
著於各該省奏事之便將此詳悉傳諭知之○復設甘肅甘山道
○己亥諭雍正五年恭值 皇考五十萬壽因會試舉人請於京
城寺廟設立經壇以申祝頌欽蒙 頒諭禁止並 敕各直省督
撫毋得因 萬壽進獻玩好 聖訓有云朕心惟以民安物阜爲
美薦賢舉能爲貴儻督撫等秉公察吏實心爲國行一利民之政
勝於獻希世之珍薦一可用之才勝於貢連城之寶仰見我 皇
考恭儉聖德實爲萬世訓行朕嗣服以來屢諭各督撫等不得於
方物之外別有進獻諒內外大小臣工無不明體朕意開歲八月

爲朕五十誕辰惟恐臣僚中或以萬壽聖節欲購覓珍奇共申祝
嘏其各省士民或且有設立經壇建立碑亭之事非先期詳悉傳
諭必將競事浮華徒滋糜費甚非所以勵官常惜物力也朕心深
所不取其飭禁之至在籍年老諸臣如尚書沈德潛侍郎錢陳群
等若以隨班叩祝跋涉遠來亦非朕優禮老臣之意况歲辛巳恭
遇 聖母皇太后七十大慶以新春敬奉 安與時巡南服諸臣
就近迎 鑾相見不遠又何必僕僕道路爲耶著將此通行傳諭
知之○庚子富德等奏到巴達克山索勒坦沙獻逆賊霍集占首
級全部納款捷音諭將軍富德等奏報巴達克山索勒坦沙奉檄
拘禁逆賊霍集占等於柴扎布嗣因霍集占欲與琿都斯等部落
暗行攻襲當將霍集占布拉呢敦勒殺呈獻霍集占首級並看守
逆屍人等隨經驗看明確馳送京師等語前此大兵平定準噶爾

各部悉入版圖而東西布魯特左右哈薩克無不傾心向化獨逆
酋霍集占兄弟孤恩反噬不得不興師問罪雖葉爾羌喀什噶爾
等城以次撫降設官定賦將就歲事而兌渠一日不獲則軍務一
日不竣是以旁午軍書焦勞籌畫並非好爲窮兵穢武之舉自將
軍兆惠富德等勦眾選兵先後追勦屢獲全勝賊勢愈蹙安集延
與巴達克山諸部共知感仰恩威歸誠恐後今旣捧檄自效逆首
授首從此邊陲肅謐各部落永慶安全露布遠聞此皆仰荷 上

蒼福佑 宗社鴻庥俾朕得續 皇祖 皇考未竟之不緒惟益

勵持盈保泰之心夙夜倍切冰兢此意當與中外臣民共之茲當
殊勳克奏茂典應修 郊 廟告功益申昭報時當長至朕方躬

祀 圖丘其敕所司敬舉受釐宣捷之忱載諸祝冊用申想款恭

惟盛京 三陵禮應親謁叩謝但以厚屆冬寒恐勤屬車之眾特

遣親王前往恭代 東陵 西陵卽擬親赴展謁而計程往返適
屆 慈甯萬壽慶辰敬以明年獻歲諭日親詣行禮然終不足以
抒積悃擬告祭 太廟之日朕親行展事至 方澤 社稷照例
遣親王恭代冬至次日朕恭詣 皇太后宮行禮亦於表文內增
撰武成慶語其御殿頒詔諸儀一併舉行既以循令節而迓崇禧
卽以慰 慈懷而布溥惠其餘一切典禮各該衙門查例舉行將
軍等凱旋至京師朕當親臨郊勞念我大臣官弁等敵愾奏功勳
施懋著酬庸論賞應備恩榮將軍兆惠已晉公階並疊賜章服其
加賞宗室公品級鞍轡以示寵異將軍富德著晉封侯爵並賞戴
雙眼翎兆惠富德著再加授一子爲三等侍衛參贊公明瑞公阿
里袞並賞戴雙眼翎舒赫德及在事大臣官員均交部從優議敘
兵丁之在行陣者賞給兩月錢糧其葉爾羌等城兵丁並賞錢糧

一月爰著策勳之令典益昭綏遠之鴻猷將此通諭知之○封回人額敏和卓爲郡王賞玉素布郡王品級○敕諭巴達克山素勒坦沙曰將軍噶德等奏爾擒獲逆賊霍集占布拉呢敦因鄰部生心俱行殺戮遣使請驗逆屍函首以獻全部歸降願爲臣僕恭順之忱深用嘉悅俟爾使至京自必優加賞賚茲以降敕賜爾蟒段四端其爾處所居之阿布都海里鄂斯瑞俱受逆賊信任附和爲惡將軍大臣等奏請諭爾縛獻朕念伊等尙非霍集占之貳恩反噬可比爾等若以業經督約乞其餘生朕亦加恩賞給但此一人在葉爾羌喀什噶爾諸回人中頗著名字爾遊牧相近當嚴行約束毋俾潛逃事致有乖忱悃爾與所屬其善自爲計以永荷將來之恩澤特諭○予故湖廣總督碩色祭葬謚恭勤○辛丑以平定準回兩部用兵始末並 御製開惑論宣示中外諭巴達克山

索勒坦沙等歸誠逆賊霍集占授首於辦理回部固告成功而平定準噶爾全局亦於此大定昨已降旨宣諭中外王大臣等恭逢國家景運昌隆殊動勳捷奏當與朕同心感慶敬迓天庥而朕於頒師奏凱時回念前事轉深祇懼非僅爲履滿思謙之虛語也準噶爾一部久外生成自我皇祖皇考屢興撻伐未旣厥緒前杜爾伯特車凌車凌烏巴什等方款闢內附在庸庸無知之徒生際昇平日久方皆狃於便安謂可拒而不納殊不思堂堂天朝撫馭方夏如達瓦齊之蠶然一物縛至京師以降王蒙養數載亦朝臣所共見者豈有儼然視如敵國至不敢受其降人之理然彼時朕以任事乏人尙未卽決策興師也厥後阿睦爾撒納等各部來降者叩關接踵實繁有徒於義固有難辭而處之偏隅又足爲喀爾喀貽患勢不得不經理遊牧返之故地且上蒼錫祚垂禧予

以經畫邊陲之事俾朕繼述我 祖宗未竟之志事而朕敢惑於
浮議不勉思敬以承之乎今統計用兵不越五載內地初不知有
徵發之勞而關門以西萬有餘里悉入版圖如左右哈薩克東西
布魯特及回部各城以次撫定現在巴達克山諸部落皆知獻俘
自效捧檄前驅以至古不通中國之地悉爲我大清臣僕稽之往
牒實爲未有之盛事卽朕始願亦不敢望其遂能至此也人情可
與樂成難與慮始在久安長治之餘亦勢所必有然憂盛危明正
當動色交儆此番遐方綏靖我將軍參贊以及一介執戈之士無
不得嫋行陣於國氣人才深有裨益然非朕力爲振作信賞必罰
以淬勵之其誰不畏難苟安而坐希無事之福乎今卽飲至告功
而日有萬幾宵旰疇咨又何能自釋敬事之懷有一日之可逸者
卽前此軍務方殷運籌乙夜曾不廢令節燕饗之文憂愁二字朕

惟於望雨憫農用之於軍務亦未至於憂愁困苦如眾人之所畏者茲雖大告武成亦惟永懷圖易思賴以爲昭受凝承之本又豈可恣意求逸耶然如去冬兆惠深入回地猝爾被遮設非朕先時各路派兵運餉在道何由集事神速便若轉圜此一節朕不自謂洞燭先幾而深荷 天地 祖宗眷佑默賜朕衷實愜於懷於此益信 天人感應之符捷如影響而欽承 景命我君臣當益交勉之軍營在事諸臣昨已加恩優敘至同朕辦理軍務者惟大學士傅恆與朕一心日夜不懈前因伊犁平定賜加雙公爵涕泣固辭今伊子福靈安尙非披堅執銳之庶而卽能奮勇行陣屢著勤勞實恆朕望著賞給福靈安頭等侍衛以著酬庸之典大學士來保年近八十行走不懈及諸軍機大臣官員日夜隨侍候報鈔錄一切均著勤勞大學士傅恆來保及軍機大臣並軍機處行走官

員若交部一併議敘仍將此旨通行曉諭知之 御製開惑論曰

夫人情有所弗槩於懷者則不能無惑况西師之役決機於午夜之密勿馳檄於絕域之阻闊語言泮不相同風俗奠然各別是安能人人而告之以祛其疑故事以問明理以答晰因倣四子講德之遺意作開惑論其辭曰有春秋碩儒者是古卑今循規蹈矩喜寬衣博帶如魯諸生厭突梯脂韋若楚公子聞信天主人欲有所締搆撻伐雖不敢面折其非而每退有後語也既而定伊犁俘名王成 舊志闢新疆兵不血刃而歸馬於華山之陽乃遣於臻成大夫之席曰唉有是哉有是哉走懷杞人之憂有日矣夫守在四夷其德莫恢往兵不祥其理莫賅今所見者迥異乎所聞則是秦皇不必築長城而漢武不必悔輪臺也大夫曰子不聞長卿之言乎非常者固常人之所疑也無何阿逆叛羣兇應如蜩如螗曰樂

曰燒斷驛據牧畜皆以逞一二隻行野宿者或致戕其身命於是
碩儒復過大夫之間曰如何如何果不出吾所訢宜亟罷是役禍
庶少輯大夫曰子姑俟之於時師重遣渠遠跳順者撫逆者勦於
是喀爾喀有青濶雜卜者漂狡僉回之驛燒也以收杜爾伯特四
部時曾賈其牛羊用賜新撫乃藉以煽惑眾客爾喀且欲私逼阿
逆之醜虜阿逆既竄罪人斯得喀爾喀眾以休以息然彼時將帥
之臣追阿逆於哈薩克爲其所賣同時準噶爾宰桑之在役者皆
習爲盜而慣軍詐者也見而輕之旣罷役則相率爲亂欲復其舊
制而恥爲我臣是和起被歎於爾康兆惠戰出於濟爾哈朗之所
因也碩儒曰吁是蓋禍結兵連吾不知何日之息肩矣爾其重整
四甄夾攻兩路阿逆復自哈薩克竄歸適遇我師又倉皇而遁去
蓋自是哈薩克亦面內歸化欲助我以擒阿逆而阿逆乃隻身入

俄羅斯境窮極伏冥誅之故也豺狼不可以犬豕畜鴟鴞不可以
鷄鳴育是反覆喜亂之徒再存之再不知感且殘賊爲奸焉是惟
翦刈灰滅之而已更不可以仁義化遷乃欲姑息了事者又以爲
不殺降人夫不殺降人可留降人之馬而與之足力以受其愚則
大不可滿福之遇難以及助二回首與我抗衡皆此沙喇斯瑪呼
斯二鄂拓之所搆禍也至庫車之稽勦質儻轂於逍遙更將申律
旗鼓一新延長驛直入而功垂成於崇朝黑水之守主客眾寡之
勢雖愚者亦知其漂搖以三千餘人敵數萬眾而搜穴得米掘井
得泉賊銃著木取鉛丸數無萬反以擊賊無不中賊之酋豪於是
兩軍相合賊乃遁逃及窮追異域駐旅馳檄獻馘稱臣遂成耆定
之功高臻成大夫乃進春秋碩儒而詔之曰兩大部落不爲不強
周一萬餘里不爲不廣五年成功不爲不速前歌後舞不爲不祥

子徒見始事之秋遷懦畏葸者之騰口是所謂人然亦然人否亦
否者也且師旅征伐之於國猶雷霆霜雪之於天非霜雪則萬物
煩鬱之氣不盪滌非雷霆則四時煙鬱之氣不鬯宣非師旅征伐
則梗我王化者無以暫伏懲創不敢抗干是以詰戎揚烈益當廣
於重熙累洽之年也子獨不見達瓦齊之懵懵乎設云事慎首禍
禮不納叛是儼然以外夷弑君者爲敵國豈不專我君哉碩儒曰
豈謂是哉陽舒陰慘生民大情離憂合歡品物同性絕者不可復
屬死者不可復生損兵折將無補功成大夫曰吁子所謂執迷而
不悟者矣成大事者不顧小謀圖大全者甯辭小害示應於近者
遠有可察託驗於顯者微或可槩且子亦知損兵折將之由乎彼
或內怯於心外受人給決機不審遲疑擿埴而自貽伊悔豈主人
之罪哉若夫虎臣狼士折衝宣力馬超龐足姚期擣幘渴賞捐軀

實不乏人而一聞如是者午夜爲之酸心舉案爲之忘食雖刻木
結蒲無以加茲而且賞延後昆太常紀績如子所云則漢祖唐宗
撥亂草創之初甯無一人結纓死綏者哉禮記聽磬聲則思又何
以云乎故非沈幾不足以圖功非果斷不足以定業彼其狼狽相
顧潛包禍謀者以螳螂之斧禦隆車之轍不自罕量何異葦苕之
鵠鳩是以王師屢入霆奮席捲如舉炎火而燭飛蓬覆湯泉而沃
白雪子何不度以全局待以歲月而爲是無稽之說哉碩儒曰若
僕者乃隙中觀闌井裏窺天以今日應機底績論之何妨再遲數
年愧矣服矣豁然悚然大夫曰未也子姑聽之夫食椹懷音非納
叛臣獎跋優遇欲集其勳密敕周防先示威親操刀必割所戒遠
巡子云應機亦非至諭三隙可乘未與大軍加徵增算何曾於民
凡有水旱無不恤賑運輸給價防其蝕侵甘肅歲賦課免庚辰兩

部永靖並及其鄰哈薩布魯樂闢文身無不內屬恭義歸仁鴻膺
爰建千古未聞若子者所謂菽麥未辨安足以知我信天主人哉
主人乃召大夫碩儒而告之曰若二子者所謂楚旣失之齊亦未
爲得也夫順天者昌逆天者亡故粵宛猶不逆時氣而奉若者豈
可恃力而誇張且屢危而屢夷愈變而愈康鉅數一動遂定二方
鑿空二萬餘里歲事五載已央使畏難而中輒未必不致禍而受
殃浮議者方且謂老成之言臧也在易師之上六曰大君有命復
之上六曰迷復有眚今得以利用禦寇由頤有慶是不亦大幸乎
夫獲此幸者宜思何以獲此幸於吳蒼方將兢兢惴惴惶惶皇皇
隕越是懼矣暇計二子之短長也哉○諭軍機大臣等昨諭兆惠
富德等與霍集斯偕來並將應行人覲回人一同行走使之不疑
今大功告成霍集斯不無覬覦率同入覲更宜慎之又慎方合事

機伊若以往和闐或烏什整裝爲詞卽婉言勸阻令其派出親信人前往若求兆惠等同去更屬不可霍集斯起程後舒赫德卽將伊子漠咱帕爾及其家屬盡行整裝送京至回地旣無滋事之人則將來仍於伊犁駐兵以休息各城回眾惟令其輸納貢賦一應善後事宜伊等卽會商妥議具奏○壬寅諭諸王大臣等以巴達克山素勒坦沙投誠逆賊霍集占授首準噶爾全局大定具表奏賀並請加上尊號雖援據典章而朕功成祇懼彌切於懷豈可崇尚虛文勉從所請西陲一事仰賴 上蒼福佑 宗社鴻庥殊勳速奏隸版籍者二萬餘里治軍者不及五年載籍以來實罕有倫比而朕所深用愜心者乃不在遠圖之式廓而在 先烈之克成欽維 皇考付畀朕躬夙夜勉圖繼述矧在早年備承 皇祖眷顧優隆每遇軍國重務卽令面聆 聖訓籌畫是朕躬之仔肩

倍重而續緒者亦倍艱今以數載閒運籌決策之勞克全我朝捷伐綏遐之略反覆自問差可無負燕貽者當在於是固非好大喜功之爲見也我皇祖聖德神功超越萬古戡定殊勳炳於史冊廷臣請上尊號尙未允行乃者關門以西迄乎大漠雖通亘古未通之境究以國家全盛餘力及之視當年之事會稍需刻難中輶者其緩急輕重固不可同年語矣然方其罪人未得朕斷不因盈廷畏葸輒事苟安若逆渠旣獻馘告功則國法用申而軍威自無可極是以富德捷奏尙請追索鄂斯瑞阿布都海里二人以絕根株朕以成事已歲卽傳諭飭止之固不能惑於築室之謀亦豈或蹈夫佳兵之戒所謂行乎不得不行止乎其所當止無成心也茲功成事定惟欽遵祖宗之成法益深兢業耳所有王大臣等加上尊號之請不必行敬惟辛巳歲恭逢聖母皇太后

七十萬壽慶辰鉅典鴻儀舉行伊邇茲以膺功旣奏上慰 慈懷
已於長至節宣表稱賀推 恩展禮稠疊便蕃其崇上 徵稱宜
以普天 大慶時敬謹恭擬再行奏請 懿旨諸王大臣其明體
朕意○諭此次進兵以來霍集斯伯克抒其所見隨處盡心協助
將軍大臣等成功甚屬可嘉著加恩封爲郡王品級貝子鄂對前
在和闐甚屬奮勉而此次又甚勤勞著加恩封爲貝勒品級○癸
卯命湖廣四川各撥局錢協濟甘肅○甲辰諭外省大計八法官
員均關徵敘大典內除貪酷二款既有實蹟例應特疏題參另行
審結其年老有疾罷軟無爲才力不及等款尙屬見聞所共知至
不謹浮躁官員向來參本內俱未將其何事不謹何事浮躁一一
聲敘此內或有公事本屬無誤而節目偶否疏闇才具尚可爲
而氣質不無驕率此等人員其才未必不堪造就上官不能舍短

取長但以意見不甚相洽遂槩登之白簡固屬可惜甚或該員平日本有敗檢踰閑而該督撫意存瞻徇僅予避重就輕轉藉此爲周旋劣員捷徑者均非整飭官方之意嗣後三年計典內如有不謹浮躁等官俱著確按實蹟詳悉登註不得籠統參劾以昭慎重著爲令○命洪澤湖巡北土隄改建飆工

十一月辛亥以平定回部頒詔中外○ 御製平定回部告成太

學碑文曰建非常之功者以舉非常之事舉非常之事者以藉非常之人然亦有不藉非常之人而舉非常之事終建非常之功者則賴 吳蒼鷺貺神運斡旋事若禍而移福機似逆而轉順順天

者昌逆天者亡故犁準夷之庭埽回部之穴五年之間兩勳並集始遲疑猶未敢信終効劙以底有成荷 天之龍在茲畏 天之

鑒益在茲妥敘其事如左達瓦齊之就俘也伊犁已大定矣無何

而阿睦爾撒納叛彼其志本欲藉我力以成己事時也人心未定
佐蠻者嘗一域肆狂萬狙應響蜂屯蟻雜不可爬梳畏難者羣謂
不出所料準夷終不可取並有欲乘巴里坤爲退守謀然予計其
志不齊將有歸正倒戈者於是督策將帥之臣整師亟進既而
伊犁諸台吉宰桑果悔過勤王思討逆賊以自贖此天恩助順
者一也二酋大小和卓木者以回部望族久爲準噶爾所拘於阿
巴噶斯鄂拓者也我師旣定伊犁乃釋其囚以兵送大和卓木布
拉呢敦歸葉爾羌俾統其舊屬而令小和卓木霍集占居於伊犁
撫其在伊犁眾回乃小和卓木助阿逆攻勤王之台吉宰桑等回
逆賴以苟延及我師再入阿逆遂逃入哈薩克而霍集占亦卽收
其餘眾竄歸舊穴此天恩助順者二也準夷之事前紀略見梗
槩茲不複紀紀興師討回之由則以我將軍兆惠在伊犁時曾遣

副都統阿敏道往回疆事小和卓木乃以計誘阿敏道而拘之及我師抵庫車問罪彼擄阿敏道以來授至中途害之及從行者百人彼猶逞其狂悖抗我師顏且敢冒死入庫車城乃雅爾哈善喀無紀律致彼出入自由然我滿洲索倫眾兵士無不念國家之恩效疆場之力故能以少勝眾逆渠懼而免脫此 天恩助順者三也知債轍之無濟掄幹材之可任時將軍兆惠以按勦準天餘黨至布魯特部落已款服其眾因命旋師定回部於是克庫車存沙雅爾定阿克蘇略烏什收和闐師之所至降者望風直至葉爾羌城下而我軍人馬周行萬有餘里亦猶強弩之末矣二酋以其逸待之力統數萬人與我三千餘人戰我師之過河者纔四百餘猶能斬將搴旗退而築堡黑水固守以待此 天恩助順者四也萬里之外抱水救火其曷能濟乃予以去年六月卽降旨派兵援馬

欲以更易久在行間者耳故兵馬率早在途一趨進而各爭前恐
後人人有敵愾之憤此天恩助順者五也副將軍富德及參贊
舒赫德輩率師進援以速行戈壁中馬力復疲值狂回據險坐俟
頗有難進之勢夫援軍不能進則固守以待者危矣而參贊阿里
袞驅後隊之馬適至夜擣賊營我師內外夾攻彼不知我軍凡有
幾萬握炭流湯之徒自相蹂躪顧命不暇於是解黑水之圍鹿駭
齧驚遁而保窻我之兩軍合隊全旅以回阿克蘇此天恩助順
者六也旣而彼料我必再入泰山之壓難當乃於我師未進之先
攜其部落載其重器跳而遠去而葉爾羌喀什噶爾二城之舊伯
克等遂獻城以降參贊明瑞一邀之於霍斯庫魯克副將軍富德
再招之於阿勒楚爾於是離心者面內前途者反旆二酋惟掣其
妻孥及舊僕僅三百人入巴達克山境此天恩助順者七也入

迹不通之地語言不同之國既已雀敵爾不狠顧其授我與否固
未可定也然一聞將軍之檄莫不援旗請奮整旅前遮遂得兜渠
函首露布遙傳此天恩助順者八也東考西師之役非予夙願
之圖何則實以國家幅員不爲不廣屬國不爲不多惟廬守成之
志無希開創之名兼以承平日久人習於逸既無非常之人安能
舉非常之事而建非常之功哉然而展轉輒湊每以艱而獲易視
若失而反得故自締始以逮定功雖予自問亦將有所不解其故
而不敢期其必然者故曰非人力也天也夫天如是顯佑國家者以
家宗之敬天愛民蒙眷顧者深也則我後世子孫
其何以心上蒼之心志列祖之志勉繼繩於有永保丕基於
無窮乎槩以銘曰二酋僭德始亂爲賊是興王師報怨以直伊犁
既平蕞爾奚屑徐讓耕闢徐讓戍設以喫以咻伊予本懷豈其弗

戢圖彼藐回彼回不量怒臂當車戕我王臣助彼狂狃始攻庫車
債轍敗事用人弗當至今爲愧悖逆罪重我武宜揚易將整師直
壓彼疆阿蘇烏什玉龍和闐傳檄以定肉袒羊羣二酉擊深知不
可活狼狽相顧固守其穴桓桓我師周行萬里馬不進焉強弩末
矣以四百人戰萬餘虜退猶能守黑水築堡闖信達都爲之傷悼
所幸後軍早行在道督敕速援人同怒心會不兩月賊境逼臨賊
境逼臨彼復徵隙馬繼以進賊營夜斫出其不意賊乃大驚謂自
天降孰敢鋒櫻大肆大肆如虎搏兔案角肅種誰敢回顧黑水圍
解合軍暫旋整旅三路期並進焉賊偵軍威信不可支掣其妻李
遁投所依所依亦回豈不自謀豈伊庇狼而受林憂利厥輜重無
遺盡掠遺其都丸遂來獻馘詎惟獻馘並以稱臣捧齋表章將詣
都門奏凱班師前歌後舞戶逐染鈞溫異聲鼓露布至都正遠初

陽 慈甯稱慶迓歲迎祥

郊

廟告成諸典並舉皇皇太學學

碑再樹豐碑再樹敢予喜功用不得已

天眷屢蒙始之以武終

之以文戡亂爲義撫眾惟仁布惠施恩寢寓共喜古不羈靡今爲

臣子疆闊二萬兵出五年據寶書事永矢乾乾勒石大成殿阼階

前 御製平定回部勒銘葉爾羌碑文曰粵稽回始肇自天方又

名默克一曰天堂大食見元回鶻見唐是皆剽彌所傳弗詳惟我

皇清撫有華夏血氣之倫均歸陶冶準夷昔強冥頑弗下恃厥險

遠實梗化者猰㺄其眾豺狼其羣以回爲羊役以耕耘利其善賈

三倍市欣拘二酋長處伊犁濱四大回城輸租獻賦騰格是供衛

拉是懼繭絲奚堪溝壑已遽有面內心其何能訴準夷旣平羣回

見天謂自今始飽食晏眠遣厥酋歸撫爾土田生死臼骨詎疑變

遷詎疑變遷德竟怨報助我叛疆狀我使詔是用興師聲罪致討

乃敢抗顏蜩螗謹謨旣侮厥外宜安厥內而何狂狃心焉昏憤殺人爲戲奪妻爲穢大失眾心無不怨背三道並發四甄齊攻酋知弗支自撫一空廿日之前駛走無蹤爾雖無蹤我追應窮滔滔洸洸連戰皆克旦夕苟延遂入異域異域畏懷舉旗助力腐鼠莫逋遂來獻馘二酋旣殲諸回永靖設官定賦去其苛政昔之諸回曉戰夜偵今恬以嬉各保性命昔之諸回爲準夷臣今語鄰封曰天王民曰天王民誰汝苦辛藝爾稼黍孽爾子孫在昔己巳爰平金川茲定回部亦己卯年歲符理紀瑞疊祥駢持盈保泰惟懋慎旃勒石葉爾羌城 御製平定回部勒銘葉什勒庫勒諾爾碑文曰機有視若失而反得智者之所慟而愚者之所惑也事有初若勞而終逸壯者之所劖而懦者之所怯也若夫定全回殲二酋戰無不克攻無不取皆二將軍及諸參贊以及行閒眾將士之力也然

予亦有所深懲於其聞者則以五年劫劬宵旰運籌狎至實未敢
偷安於頃刻也幸我武保定庶因答 乾貺慰 先志且以免浮
議之指斥也葉什勒庫勒諾爾者我副將軍富德等窮追二酋至
巴達克山之界獲其降者萬人二酋僅以身免而遣使索俘遂得
獻馘振旅以成茂勣也其地倚山臨水單騎可容而我突將無前
四甄並發如入無人之域也賊眾首尾不能相顧豎我回纛以招
之降者鋪崖以來霍集占持刃止之或且反戈倒戟也是以二酋
見事不成拔身遠跳駢突而嚎息也先是蹙之於霍斯庫魯克襲
之於阿勒楚爾無不以少勝眾批亢擣堅桓桓之士眞如驅虎豹
而逐羆兔纏頭碩鼻者流皆憚恨踉蹌見卽辟易也是以先聲異
域駭其跳盪逆助順用擾重輜而獻兇級也我兵未深入巴達
克山境者則以討逆之師不蹂無罪之地姑遣使焉彼或曉逆順

亦將擒獻是以將帥之臣審機度時我武少輯也卒歲事而告成功則亦未爲計之失也回部始末已見於勒銘葉爾羌之碑辭不複綴也特紀耆定之在茲是以誌歲月而刻石也勒石諾爾上○戊午兆惠等奏報霍罕額爾德尼伯克將所屬安集延瑪爾噶朗納木干霍罕等四城歸附並齊哩克布魯特及額德格訥布魯特阿濟畢等人眾遣使歸誠○辛酉諭陝甘總督楊應琚籌辦軍需循照大學士伯黃廷桂規畫章程俱能責力經理所辦凱旋馬匹措置尤爲妥協見在西陲善後各事宜正資協心襄事著加恩晉階太子大師以示優獎○癸亥命庫車屯田○甲子再加甘肅河西河東河西各屬折賑價銀○命湖廣江西搭運通州倉米兌存浙江江蘇備用○建闢展等處倉堡○丁卯晉封公扎拉豐阿爲貝子封散秩大臣薩喇爾爲伯○己巳命海明馳赴葉爾羌協同舒赫

德辦事以恩不署吏部侍郎

由工部侍郎兼署

○

調蘇崇阿爲江蘇布政

使台柱爲河南布政使以崔應階爲山東布政使調蘇爾德爲江

西按察使以王檢爲安徽按察使

由長蘆運使遷

○

壬申定直隸州知

州六年引見例○癸酉申命釐正文體○甲戌諭軍機大臣等兆

惠等奏稱大兵凱旋霍集斯告請同行入觀看其情形尙無他故

前因霍集斯知額敏和卓已受王封而已尙爲貝勒故仍稱爲伯

克且向舒赫德飾詞謂烏什原無貢賦恐難信任是以密諭兆惠

帶領來京今伊旣懇請同行且去年葉爾羌被圍殊爲勞苦此次

往巴達克山亦頗效力自應加恩但仍令其居於舊地究屬未便

俟伊到京時再酌量從優安插伊子漠咱帕爾起程亦不必照解

送厄魯特宰桑之例仍與前此入覲一體辦理伊性好猜疑恐其

驚惶滋事舒赫德等當善爲慰遣昨命傅景來京卽令其沿途護

送務期妥協霍集斯其餘諸子作何辦理亦著具奏○命京官豫支來年俸米之半以平市價

十二月丁丑朔再撥湖南米二十萬石於浙江備賑○己卯授富德爲領侍衛內大臣○庚辰准佐雜官由本籍赴任借支養廉○辛巳諭各省學政釐正文體○參贊大臣舒赫德等奏酌定和闐六城賦稅一收穫穀石應照各城十分取一因甫經平定酌量減收俟來年另行定數其塔哩雅沁地畝所出與佃人分半收取卽照舊例辦理一所產玉石視見年採取所得交納一採金三百戶每年照舊例交金六十兩一交納鵝格錢文因六城生計未裕定爲一萬二千鵝格俟三十年後酌量加增以四千充官兵三百員名鹽菜之需以七千七百分贍各城伯克及諱經支用餘三百流轉備用一貿易之伯德爾格等十戶應交金十兩請俟商人通行

後再行交納一六城官果園七處既被賊踐踏基址亦小請賞給各城伯克一和闐難得銅鉛向俱藉葉爾羌等處錢文行使見在咨取內地匠役在葉爾羌鼓鑄俟鑄出時酌量撥解得旨如所請行○甲申封 皇六子永瑢爲貝勒出嗣慎郡王○諭皇子教育宮中俱服四團龍補服及分封之後其服用各視見在爵秩第念皇子年屆受封豈必槩膺王爵自親王郡王以及貝勒貝子公秩分五等惟朕所命但皇子等均在內廷自不與外廷宗室同科彼兄弟同懷聯序之間亦未宜以章服等差致生形迹嗣後皇子分封所有俸糈官屬各依封爵外其一應章服著仍照皇子時服用如此則儀制旣爲允協而諸皇子兄弟聞亦不致稍存意見我子孫億萬年應奉爲令典著將此旨錄存上書房及宗人府以昭來許○辛卯命湖南於撥運浙江米三十萬石外再籌接濟○壬辰

諭御史羅典請定市肆米價史茂請禁花檔小唱雖各以民生風俗爲詞而其實於事理俱未明曉今年夏閒得雨日遲恐米糧易致翔貴先經發倉平糴以裕民食及甘霖沾濡大田仍獲半收惟節候已晚自不能致豐稔市價未卽平減職此之故然使非六月內得蒙甘澤物價之騰躍伊於何底迨時屆冬令復就各廠接糴麥麪豆石草束並豫借三品以下京員俸米俾糧石充裕市價不得囤積居奇所以酌量調劑之法不過如此自開倉以來糧價每石減銀二三錢不等此人所共知者若該御史所奏市肆貿易米麪定以升斗限以價值無論市價不貳早爲子輿所譏物理斷不可行卽專爲撙減厥價而論亦恐販賣居奇者愈得因緣爲奸而貧民何從得濟國家令行禁止固無所不可至以米價強勒市人則初無此政體羅典乃欲援鹽法以例穀數則又所謂遁辭知其

所窮耳至史茂欲禁止小唱而張皇其說以爲色飛淫蕩開繁風俗人心云云言之尤爲太過此等不過能僵跼技逐末營生之一類如果在地方生事滋擾本應隨時究治然京師地當釐轂理大物博爲五方歸極之區若紛紛躡緝徒使胥吏乘機多事爲累不淺且由此推而極之如古所稱街歌巷舞者果一一盡千例禁乎又查禁不已必致改業今日花檔明日彈詞說書以至手技口技何所不至亦不能隨蹤躡迹盡舉而繩之以法立政去其太甚不尙煩苛二摺所見略同均屬不知體要著將原摺發還並通行宣諭知之○甲午冊封 令妃魏佳氏爲 貴妃慶嬪陸佳氏爲

慶妃賴嬪巴林氏爲

賴妃貴人博爾濟吉特氏爲

豫嬪○內

閣學士王鳴盛因事降調○丁酉嚴禁紬段錦絹出洋○琉球國

王尙穆表謝冊封並進方物○是歲朝鮮來貢○會計天下民穀

數各省通共大小男婦一萬九千四百七十九萬一千八百五十九名口各省通共存倉米穀三千一百七十八萬四千八百四十四升五合二勺零

東華續錄

乾隆五十一

臣王先謙敬編

臣周潤蕃恭校

乾隆二十五年庚辰春正月戊申諭來歲恭逢 聖母皇太后七

旬萬壽今年爲朕五十誕辰仰荷 上蒼福佑西陲大武告成本

年八月著舉行恩科鄉試來歲三月舉行會試○以西師凱旋再

免甘肅來年額賦○命撥甘肅鞏昌等四府州倉穀十餘萬石於

附近災屬備賑○庚戌命烏魯木齊屯田○癸丑增給京師五城

煮賑各廠米石○乙卯霍罕額爾德尼伯克等遣使入覲○丙辰

巴達克山素勒坦沙等道使入覲○定邊將軍兆惠等面送逆回

霍集占首級並俘酋捫多索不等至京○丁巳 上御午門樓行

獻俘禮命霍集占首級懸示通衙宥捫多索不等罪○己未布魯

特阿濟比遣使入覲○庚申諭據周人驥奏各省流寓民人入川者甚多請設法限制等因一摺此所謂知其一不知其二也國家承平日久生齒繁庶小民自量本籍生計難以自資不得不就他處營生糊口此乃情理之常豈有自舍其鄉里田廬而樂爲遠徙者地方官本無庸強爲限制若其中遇有生事爲匪之人則在隨時嚴行查禁不得以一二敗類潛蹤遂爾因噎廢食今日戶口日增而各省田土不過如此不能增益正宜思所以流通以養無藉貧民卽如見在古北口外內地民人前往耕種者不下數十萬戶此孰非去其故土者然口外種地著衣食漸多饒裕固難執一而論也西陲平成疆宇式廓闢展烏魯木齊等處在在屯田而客民之力作貿易於彼者日漸加增將來地利愈開各省之人將不招自集其於惠養生民甚爲有益若如周人驥所奏有司設法禁止

不但有拂人性且恐轉滋事端否則徒爲增設科條而日久又成
故事封疆大吏當通達大體順民情所便安隨宜體察備有流爲
盜賊如川省咽匪之類則實力懲治毋使養奸貽累旣不絕小民
覓食之路又可清閭閻盜賊之源斯兩得之著將此傳諭湖廣江
西四川各督撫令其妥協辦理○壬戌命在京安插回人另編佐
領○庚午傅堯以不職革職以顧濟美爲雲南布政使調永泰爲
四川按察使以宋琳爲山西按察使由歸綏道遷○辛未參贊大臣舒
赫德等奏據薩納珠卡座送到土伯特使人達什佳木撮等十人
稱係拉達克汗所遣齋書呈送臣會同大臣官員等傳見達什佳
木撮云我係管轄右界五千戶頭目聞大兵平定回部特奉書稱
賀請通貿易以番段回帶爲贗臣等宣慰筵宴訖授以復拉達克
汗書及蟒錦段匹並分賞來使段布令其起程再查見在回部安

靜其布魯特霍罕安集延瑪爾噶朗等貿易之人絡繹不絕臣等照舊例收稅數次後回城伯克等懇告云舊例收稅稍重彼時牲隻價賤尙不甚累今逆酋擾害之後葉爾羌喀什噶爾羊一隻價至十餘兩肥馬一匹價至五六十兩商賈未免觀望不前新暫減收俱係實在情形請將回人買來牲隻暫改爲二十分取一外來商人牲隻暫改爲三十分取一其餘皮張段布仍照舊例收納報聞○乙亥諭御史吉夢熊奏經筵事宜一摺所言是非參半其中有應行採擇者有事不必行且已屢經降旨飭禁者如講官係朕簡用大員經筵講章本應自行撰擬期副獻納論思之義乃故事相沿竟有由翰林院循例屬橐者朕於講官皇本時尙爲研討折衷著爲經書一論務在自抒心得而侍案敷陳者顧以成言誦習聊爲塞責可乎該御史所奏實爲近理嗣後將此明著爲令至稱

二十二史通鑑綱目諸書內有闢治道者應俱令其進講一條此則可以不必帝王有密單心緝熙典學豈專恃此每歲春秋兩舉之文特以典禮崇重必與廷臣面詢稽古乃足懋昭嚮學親賢至意夫經書義蘊畢賅天德王道之大端實爲兼貫初無待旁及史鑑以浩博相誇且朕幾餘披覽於古今治亂得失之故研窮往復見在自頒發正史之外於通鑑一書特敕儒臣分條修輯彙冊陸續進呈朕精研訂正凡中有所見必親加評骘務期理明事覈以成善本若僅於進講時敷衍一二則以爲甄綜史事無論挂一漏萬徒爲具文正昔人所謂一部全史從何處說起者也又稱講章在於簡約不必以駢麗爲工云云此則向來久經訓飭之事卽如殿試策內士子多用頌語朕以其無開實政尙令一切屏除况講筵自有體裁何取冗詞長語以富麗爲工前諭諄諄講官當所素

悉向後當有則改之無則加勉以光鉅典是用別白宣示俾中外共知之

二月丙子朔賜霍罕額爾德尼伯克敕諭曰爾遠處邊陲聞大兵平定回城逆賊迷竄信息卽募化歸誠請擒賊自效遣使入觀深可嘉尙來使等俱安善至京朕加恩召見頗申宴賚賜爾段匹器什若干爾其祇受又賞來使及從人服飾器用銀兩有差覽爾奏內有未盡之詞俾使人面陳等語今來使等並無所請朕故未有他諭但爾部落素被準噶爾侵擾今旣爲朕臣僕自必加恩撫恤爾其約束所部永享無疆之福諭送爾使之索諾木車凌等仍有一面傳諭旨爾其知悉賜巴達克山素勒坦沙敕諭曰爾遠處邊陲誠心向化擒戮逆賊霍集占布拉呢敦呈獻屍首願以全部爲朕臣僕又遣額穆爾伯克巴圖爾伯克入覲恭順之忱深可嘉尙今

永使等俱安善至京朕加恩召見頻申宴賚以酒擒賊有勞特賜
綵段文綺衣服器什若干爾其祇受並賞來使及從人等服飾器
用銀兩有差從前準噶爾侵擾爾等部落今既爲朕臣僕自必加
恩撫恤其循爾舊俗以安生理約束所部永享無疆之福至來使
奏稱爾部落人等恐以霍集占之故致啓據鄰封等語霍集占負
恩佯逆遠邇咸知兄已就擒戮諒鄰部亦未敢妄動爾向來若與
鄰封有隙當自行辦理或果因霍集占啓眾可呈報駐紮葉爾羌
大臣俟查奏辦理護送爾使之明仁等仍有面傳諭旨爾其知悉
賜布魯特阿濟比博羅爾沙呼沙默特齊哩克卓爾瑪特等敕諭
曰爾遠處邊陲閩大兵平定回部巴達克山呈獻逆賊屍首卽募
化歸誠遣使入覲深可嘉尙今來使安善至京朕加恩召見頻申
宴賚賜爾段匹器什若干爾其祇受又賞來使及從人等服飾器

用銀兩有差爾部落素被準噶爾侵擾今旣爲朕臣僕自必加恩撫恤爾其約束所部永享無疆之福再代爾入覲之使人諸凡安協當加以愛惜爾其知之○命水師官員迴避本省○丁丑諭御史朱丕烈參奏覆勘試卷大臣奏惹田等徇庇不公一摺經朕詳悉面諭並特派大臣等會同軍機大臣提取各原卷逐一詳加覈對今據覆奏有該御史原經籤出而覆勘大臣誤行指駁者江西省汪其度一卷未經列入奏單者湖北省陶大朋廣西省蕭鼎投二卷奏惹田等旣經司事覆勘乃未將原勘官籤出各條應存應駁及應行聲明之處悉心分別查辦咎本難辭至摺內所稱瞻徇考官鄉情世好爲本生巧爲開脫之處則見在細覈各卷如考官錢維城王鳴盛錢載等勘過試卷內其處分已有部議應行降調及罰俸數年者卽增入摺內所指各條亦並無所加損是該御史

所參俱無確據朕復召入面詢該御史亦不能更指其非此其涇
渭較然固非此次派出大臣所能稍爲偏袒並調停中立如和事
老人之爲也但磨勘一事向來視爲具文以致舉子應試考官衡
文無由大彰德勸以至士子習尚紛歧罔識行文正鈞不得不亟
爲釐正是以詳定磨勘條例然舉行伊始朕本憲責不過欲去其
太甚俾知警覺提撕豈必逐字逐句加意吹求致獲爵者無一自
全而典試者盡于吏議斯不已太甚乎然考官銜命掄才旣優其
廉節路費又復獲爾許桃李卽試卷有疵若罰俸停升之類實所
應得設致罷官降調朕必曲宥此中自有權衡若官官相護卽此
罰一年兩載之俸亦必冀爲開脫則不獨覆勘者罪所難容卽考
官等朕亦豈能寬貸今秦蕙田等旣無此等情弊則疏漏各條所
謂公過非朕所深惡矣朱不烈以心疑或然之語彈劾屬虛朕亦

不能爲之匿其所短正所謂瑕瑜各不相掩者也况直省硃墨卷汗牛充棟不但秦蕙田等三四人之力未必精覈無遺卽自謂悉心推勘如朱丕烈所分止有數十卷設令再派大臣爲之檢校伊能自信更無挂漏乎明季科道惡習專以黨援抨擊爲務遇事交章傾軋而九列中又或各樹私人互相報復固由駕馭失宜所致而臣工中各自便其門戶之私不惜害及朝章固是其所關於治道者甚大朕心存炯戒乾綱獨攬務期朝寧肅清諸臣中諒不敢稍生狎玩之見卽有此等伎倆亦何所復施今屢勘一事嘵嘵不已然杜漸防微其端實不可長所有覆勘疏忽之秦蕙田觀保錢汝誠著交部議處御史朱丕烈所奏不實亦著交部議處然若因其參劾大臣而該部遂有意從嚴思以箝制言官之口更難逃朕洞鑒將此通行傳諭中外知之○禮部議准山東按察使沈廷芳

奏

顯帝原諡壯穆實與功德未符順治九年加忠義神武之號

名稱雖盛謚法未更今際武成大告式荷神庥請加更正得旨

用神勇○辛巳命直隸留北倉米十萬石於河工備用○定軍流

人犯著赭衣○壬午上御經筵○癸未上啓鑾謁東陵○

丙戌上謁昭西陵孝陵李東陵景陵至孝賢皇后

陵奠酒回鑾○戊子諭回眾人等昨因烏什回人等訐告霍集斯

父子苦累部眾侵漁貢賦經辦事大臣等具奏朕以霍集斯輸誠

效力所有過失皆從前陋習若遽行治罪心有不忍但仍令其管

轄所屬則上下猜嫌必不能相安無事即如準噶爾人等亦因聚

斂成讐上旣陵虐下亦憤恨互相侵噬以底滅亡可爲明鑒因將

霍集斯父子優其廩祿安插京師而各城頭目亦自知所懲創悛

改舊習但恐愚頑無識之徒因此遂長刁風摭拾已往之事公行

告訐或伊什罕等圖得阿奇木之缺或所屬人等妄生事端挾制
該管大干法紀嗣後有似此者非但不行辦理仍究明情節重治
其罪斷不寬宥爾等知此惟期上下相安勤於生業勉爲良善永
享昇平尙其敬聽無忽○壬辰以溫福爲內閣學士由內閣侍讀學士遷○

癸巳 上還京師○丙申 上啓鑾謁 泰陵○己亥 上謁

泰陵回鑾○以兆惠富德爲御前大臣○辛丑增重生歲科試五
言排律詩○壬寅定邊將軍兆惠等振旅凱旋上自黃新莊啓
鑾至良鄉郊勞○改葉爾羌等處臺站爲步遞○癸卯 上還京
師○甲辰賜哈密扎薩克郡王品級貝勒玉素布等冠服有差○
乙巳禁京城國戶○命富德軍機處行走

三月丁未諭軍機大臣等阿桂奏稱伊犁河以南有地名海努克
與固勒扎相隔一日程途水土沃衍請於此處先行屯種相其形

勢分立村莊等語所辦甚是俱依議行果能實心奮勉次第辦理
則屯田一事當錄伊經始之功也至村莊居住回人需兵防護非
尋常屯田處所可比必固其堡寨勤其瞭望庶藏匿之瑪哈沁及
哈薩克等不敢滋事至所奏起程以前派回人修理穆素爾嶺道
路及將來安設臺站行知舒赫德酌辦等語從前準噶爾與回人
往來俱由穆素爾嶺一路今既屯田伊犁自應時加修理其酌派
回人及安設臺站俱傳諭舒赫德知之又諭安泰等奏屯田以漸
開擴直逼伊犁自烏魯木齊至羅克倫擇水土饒裕之地立四村
莊每莊屯兵八百餘名委遊擊一員都司一員分派雜職等督課
耕種等語所見甚是可卽勉力善爲經理至設立村莊尤宜防範
盜賊不可輕忽所奏官兵四五千人間有疾病乞賞給醫士及藥
材等語著傳諭吳達善於甘肅選良醫二名並各種藥材送至烏

魯木齊備用○以程巖爲內閣學士

由太常寺卿遷

○戊申御史朱嵇奏

殿試閱卷皆係欽派大臣日久不無懈弛請倣內場監試例於閱

卷日派王公大臣及科道官員監試至閱卷大臣擬定十名後請
卽將十人帶領引見仍於次日傳臚得旨所奏確當如所請行○

庚戌命一家三人內二人陣亡者加賜廕卹○賜哈薩克阿布勒

巴木比特阿布賚阿布勒比斯哈巴木拜等敕諭曰去歲爾等哈

薩克之人搶掠烏梁海我將軍大臣等卽欲興師問罪朕因爾阿

布賚等歸誠已久須詢問確實續因爾等貿易之人告稱搶掠烏

梁海係爾處之巴魯克巴圖魯則與爾等無涉但爾等受朕深恩

若力能擒獻巴魯克巴圖魯更見憇誠特遣侍衛納旺傳諭尙在

中途爾等已遣使貢馬並求入覲或爾等知烏梁海被掠之事悚

懼祈請以昭恭順朕益鑒爾等誠意爾等但遵旨將搶掠烏梁海

等所獲查出送還卽巴魯克巴圖魯亦尙可加恩曲宥嗣後惟約
束所部以安生業至爾等所奏遵旨與布魯特和好而去年貿易
人等爲所搶奪等語但爾等外藩使人來京朕皆面諭以和輯鄰
部將來布魯特入覲必更加訓諭務守法安生不致互相戕害爾
等來使已命侍衛等護送來京至日自加恩賞今以降敕賜段各
四端爾等其祇受敬悉○禮部題和碩和嘉公主下嫁和碩額駙
福隆安其筵宴照淑慎和碩公主及和敬固倫公主之例得旨
嗣後固倫公主著筵宴二次和碩公主著筵宴一次並載入會典
著爲例○辛亥 上親耕耤田○癸丑 皇十四子永璐薨○乙
卯命散秩大臣柏成內閣學士世貴冊封朝鮮國王繼妃金氏○
己未諭成袞扎布奏稱原任台吉旺沁多爾濟告假前往遊牧踰
限不回軍營轉奪伊母哈屯馬匹向東逃走派人趕回詢問據稱

自願毫無生路因潛取馬匹欲赴京城等語前已將如何辦理之處行文理藩院旋准咨覆令將軍折衷辦理見在派員押解送京等語旺沁多爾濟原係獲罪留營效力之人乃乘告假踰限奪馬逃走拏獲後始以來京爲詞如不被人拏獲當不知其逃往何處也成袞扎布並不參奏惟將如何辦理之處行文理藩院殊屬非是又稱伊見有病請遣回遊牧更爲錯謬除俟將旺沁多爾濟解送來京明白審訊治罪外成袞扎布著交部察議至理藩院堂官接據文移亦不據情參奏率行咨覆迨成袞扎布奏請解京後朕面詢納延泰仍復枝梧巧辨更屬糊塗納延泰著革去理藩院尚書其所遺員缺著富德補授○壬戌諭朕詢問霍集斯以烏什回眾等告伊父子情事據奏稱因回人等與伊不合是以被控今照請留京等語其意殊屬誠切著照所請回爲資給安置京師但其

先世墳墓遠隔故鄉著加恩將伊幼子托克托索不遣回阿克蘇
以供祭埽其烏什所有田產卽行變價在阿克蘇置業賞給托克
托索不承管著舒赫德等遵照辦理仍傳諭該處回眾俾咸知朕
意○諭逆賊霍集占等雖負恩肆惡自取誅戮至其先世君長一
方尙無罪戾今回部全定喀什噶爾所有從前曹和卓木等墳墓
可派人看守禁止樵採污穢其應行修葺分例並著官爲經理以
昭國家矜恤之仁而外藩等亦共知所激勸著舒赫德新柱等卽
遵諭行○甲子 上臨和碩和婉公主喪次賜奠○丙寅 上幸

皇八子永璇第○諭前因下五旗王公及遠派宗室等戴用綉
絨頂帽並有濫行賞給太監哈哈珠子者是以 皇考曾經禁止
今果親王二子俱未戴用和親王之子果親王之子俱係 皇考
之孫莊親王至二十三貝勒之子亦俱係 皇祖之孫非別宗室

可比仍應戴結絨頂帽嗣後皇孫內未封爵者俱准戴用至曾孫世次既遠應俟封爵後各戴品級頂帶著宗人府存案永遠爲例
儒相沿日久復有僭越戴用及濫行賞人者著該衙門不時稽查
○皇后行躬桑禮○己巳晉封 純貴妃爲 皇貴妃○諭愛必達等奏沙匪郡尋與交目蘇由爲難闢入沿邊漫卓馬鹿二案
搶掠滋事汎弁集兵追捕旋即奔回見在咨會安南國王迅飭擒
拏解究若越界追擒未免疑懼等語辦理甚屬非是該省邊地與
安南接壤守界不可不嚴然此特爲外夷恭順奉法者言之耳今
沙匪因交目而擅擾内地夷寨則已悍然爲匪並不守界矣夫闖
入者敢越天朝之界而追捕者轉不敢問外夷之界惟知按兵境
上莫可誰何徒事行文飭捕遷延歲月歸於烏有了事成何體制
且官兵出境追賊所欲得者闖入我境之沙匪耳於該國良民何

與亦本不當滋擾而乃先存越境疑懼之見俾不肖弁兵從而藉
口此皆明代以前漢人畏葸錮習實則因循廢事反稱不開邊疆
殊不知外夷因是得窺虛實輕視中朝其算厯厯可覩必達又
何所顧忌而爲此遷懦不曉事之語乎在該督等駐紮省城偶遇
緣邊一二奸徒竊發猶非意料所及本可不罪今乃任弁目等平
日巡防不力沙匪既乘閒而來臨時又復擒捕不嚴以致沙匪潛
蹤而去此等弁目正當嚴查特參以示儆戒又何得僅以疏防照
例了事此事在巡撫劉藻尙不兼節制可從寬免而該督提則誰
可分尤愛必達身任封疆統轄所見若此豈朕期許簡畀之意愛
必達著交部嚴察議奏額爾格圖著交部察議具奏

夏四月乙亥朔諭皇子內封親王郡王者所用朝帽頂卽照所封
之爵如封貝勒貝子亦著用郡王朝帽金黃朝衣○甲申弛私造

鳥槍禁○丁亥調王際華爲兵部侍郎錢汝誠爲刑部侍郎○己亥諭軍機大臣等內大臣薩喇爾人頗篤實效力有年今患病瀆逝深爲軫惄著加恩派散秩大臣一員侍衛十員往奠茶酒仍賞銀一千兩治喪伊兄布林見在熱河若欲來料理喪務卽著由驛赴京或因天暑年邁難於行走亦不必勉強惟令薩喇爾之子奔赴可也

五月甲辰朔日有食之○諭序臨北至一陰始生薄蝕適逢益切乾惕古帝王克微天戒不敢以宿離有常度爲解朕亦同此志彌月不雨蒿目增憂幸卽活膏夢稔可望然盛滿爲虞匪藉過災知懼始斤斤動色咨儆爲也前歲日食下詔修省而建言者或毛舉細故摭拾浮詞雖不足深尤究無裨實政又清理刑獄聞歲已敕部舉行踵事不已正昔人所稱赦非善政者應天以實不以文朕

方側席省躬所有本月朔內廷例用龍舟上年既以禱雨不行今
雖際時和並飭停罷用昭祇荷天仁示戒之至意諭眾知之○
丙午軍機大臣議奏陝甘總督楊應琚奏烏嚕木齊見議移駐提
督管理地方糧餉之文員自不可少請倣照哈密巴里坤之例設
同知一員管理地方通判一員收放糧餉並倉大使一員以供差
遣出納再設巡檢二員分駐昌吉羅克倫兩處以上各員統繩哈
密兵備道管轄又稱漢中府同知同州府通判二缺韓城洋縣縣
丞二缺西安府照磨一缺應裁即可移駐烏嚕木齊毋庸另設均
屬調劑得宜應如所請得旨此同知定爲滿缺○戊申諭舒赫德
奏稱過穆素爾嶺下至山麓有洞名塞塞克愛噶爾雅勒其險處
約四十餘里一值風雪卽難行走從前準噶爾於其地樹旗誦經
致祭今四月初旬遞送事件兵丁有凍斃者酌於附近之克斯地

方造屋以資避禦等語穆索爾嶺爲往來要路今山澗險阻猝遇
風雪人力難施蒙古風俗俱誦經致祭著傳諭舒赫德如回人內
有善於禳禱者令其虔誠輒或無其人卽遣厄魯特人致祭○
己酉山東巡撫阿爾泰奏東省水利以濟運爲關鍵以入海爲歸
宿查濟東泰武之老黃馬頰徒駁鬲津沙河等河兗沂曹之洸泗
涑順隄百花等河見經挑挖計共六十餘道皆節節疏通暢流無
滯沂州府屬蘭鄉舊淹之處今開魚梁艾山引鵝蛋等溝入於芙蓉
莊燕子等湖工程率皆完竣運河民埝計長七百餘里亦經加高
培厚修整完固其魚濟等州縣沿湖向無堤埝者恐微湖水溢悉
皆增築以衛民庶青萊所屬榮安平度昌邑濰縣高密等州縣應
挑之支脈落葉五龍白狼等河計共三十餘道俱節次挑竣再查
青州府淄河入海之道上寬下窄中多彎曲每遇山水建瓴而下

勢難容納今既開直挑深口門若加深潛又恐海潮倒漾止宜勦
加挑淤堅築堤岸捍禦萊州府之膠萊河納上游青州府屬諸安
昌壽諸水又高密縣境有膠河一道其流亦趨膠萊易致漫溢今
查有百脈一湖若將膠河之水導之使入分流而入膠萊則水勢
既減其流自緩而入海之勢亦暢得旨可謂留心民瘼但河道既
多頭緒紛如各繪圖貼說奏來庶一覽明白矣尋奏各河有歸湖
入運者有自運分流由河達海者又濟南等州縣有另開之引河
並青萊府屬之淄河膠萊及新挑之福明等河俱繪圖貼說呈覽
得旨甚詳妥○辛亥諭廷試士子爲掄才大典向來請卷諸臣率
多偏重書法而於策文則惟取其中無疵類不疑充選而已敷奏
以言特爲拜獻先資而就文與字較則對策自重於書法如果文
義醇茂字畫端楷自屬文字兼優固爲及格之選若其人穡錄不

能甚工字在丙而文在甲者以視文字均屬乙等可以調停入彀
之人自當使之出一頭地况此日字學稍疏將來如遇館選何難
臨池習之儻專以字爲進退兼恐讀卷官有素識貢士筆迹者轉
以此藉口滋弊非射策決科本義也見在定例擬選十卷進呈須
俟引見始定名次衡文尙待觀人而閱卷時竟先抑文重字可乎
又向來讀卷官雖例不回寓然皆各覓公所散住地非鎖院人得
自由在監試王公大臣等既不能各分一員同居糾察而讀卷諸
臣從容退息亦何不可遣人回家潛通消息者此而置之不問則
凡鄉會試之設法關防又何取焉且試策不過一二百卷以十四
人公閱卽一二日亦可竣事乃遲至三五日始行進呈晨集暮散
展轉需時於形迹尤爲未協著大學士九卿將嗣後讀卷官如何
參覈文字務令取擇適中並作何住居監察剋期竣事之處一併

詳悉議奏以協朕期於名實俱副肅清衡校之至意尋議廷試讀卷自應取文義醇茂者拔置上第若策對全無根據卽書法可觀亦不得入選至讀卷官各覓公所散住誠非設法關防之意查向來讀卷俱在內閣本年經大學士臣來保奏明在文華殿閱卷應請卽於文華殿兩廊傳心殿之前後房間及派出監察之王大臣科道收掌等官一同住宿再每科試策不過二百餘卷舊例讀卷十四人未免過多嗣後將應行開列人員請簡八員足資辦理再閱卷請定限二日擬定十卷進呈從之○王子諭今歲廷試有條對策問以古之屯田爲勞民今之屯田勞民正所以惠民者新進摭拾陳言不悉實政固不足怪然見在新疆墾種實無一勞民之事以書升諭秀者尙不免形諸廷對何況蚩蚩無識之徒以謗傳謗伊於胡底故有不得不明白宣示者西陲戡定回部悉平朕之

初念豈務爲好大喜功今亦不過輯其舊部復其本業而已又安肯轉事勞民動眾蓋回人等本以種藝爲生自爲準夷驅使執役伊犁各處習耕佃者延袤相望今當埽穴之餘在殘眾自營生計不過還其所固有而駐防大臣等循行勸墾亦惟用其人以墾其地曾有一內地百姓抑之負耒而往者乎總督楊應琚前此酌籌屯務於派駐兵丁採買牲畜部署頗涉紛繁朕以其未得此事要領屢降諭旨令其從容隨宜經理今日奏到伊亦自知前議之非並稱各就本地力量情形因利乘便可規久遠則前後擘畫緣起厯厯可數至應遺之犯議令前往種地以減死之人而予以謀生之路伊等既不得謂之民又安得謂之勞也且朕規畫此事更有深意國家生齒繁庶卽自乾隆元年至今二十五年之閒滋生民數歲不下億萬而提封止有此數餘利頗艱且古北口外一帶往

代皆號巖疆不敢尺寸踰越我朝四十九部子弟臣僕視同一家
沿邊內地民人前往種植成家室而長子孫其利甚溥設從而禁
之是厲民矣今烏嚕木齊開展各處知屯政方興客民已源源前
往貿易茆簷土銼各成聚落將來阡陌日增樹藝日廣則甘肅等
處無業貧民前赴營生耕作汗萊闢而就食多於國家牧民本圖
大有裨益夫利之所在雖禁之而不能止民可使由不可使知將
來必徐觀其效而已朕又何所爲而先事勞之前此武功告成不
過偏師嘗試之爲而好議者或云黜武今辦理屯種亦止因地制宜
之舉而無識者又疑勞民朕實不解且付之不必解而天下後
世自有公論耳因閱對策特降此旨並將楊應琚奏摺通諭中外
知之○軍機大臣議奏陝甘總督楊應琚奏葉爾羌舊制錢以普
爾五十枚爲一騰格作銀一兩回民歲貢兵丁月餉以此爲準後

市錢稍廣經舒赫德等奏請每銀一兩以七十文爲定見在市錢
日益平減至以錢百抵銀一兩並一百零十文不等官兵月領錢
數十文不抵應關餉銀之用既無可加增又不便議令回民增錢
上納請將見鑄之錢重如其舊惟較舊樣微薄而加廣於錢面添
鑄回子字一分二字以錢百作銀一兩鑄出新錢卽散爲見駐官
兵月餉所有回民歲貢亦照此爲則查錢法之低昂由於市價之
多寡聚散爲權衡時增時減本無定準在內地尚不可強繩以官
法節制以定價况在回部地方鼓鑄伊始收舊鑄新廣爲流通則
錢價日就平減亦屬物情自然此時止宜酌市價之貴賤以定出
納之準若必拘以一文抵銀一分百文作銀一兩則該處白金本
屬稀少見在白銀一兩已換至一百零五文至十文不等焉知將
來不再加平減則官兵等支領百文之錢仍不抵其應關餉銀之

用況錢式早經頒定又復減薄分數於錢上鑄明定值強制回眾
以不得增減微特勢所難行轉致更張成例該督楊應琚業回甘
肅請交舒赫德酌量市值情形隨時妥協辦理所有該督請改定
之處無庸議至所稱阿克蘇每年有貢納銅斤庫車亦有產銅之
山應令該處回民量力輸納卽於應徵貢賦內扣抵以資鼓鑄事
屬可行應一併令舒赫德查明妥議具奏得旨依議速行○癸丑
賜畢沅等一百六十四人進士及第出身有差○戊午陝甘總督
楊應琚等奏南路自哈喇沙爾至庫車一千餘里內多戈壁馬艱
水草其自布古爾和屯至托和奈大戈壁內查有阿爾巴特一處
可得水草又由托和奈東行有地名喀喇烏蘇者近北山之深溝
亦有水草可資牧放其自庫爾勒抵哈拉哈阿滿一站其間另有
捷徑小嶺不過數處修其山麓培土如棧道人馬俱可安行臣等

前因布古爾和屯至托和奈中多戈壁因於此二站內安設三站馬匹俾得輪流馳遞今旣查有水草之處應將二站多備之馬儘數撥出另於阿爾巴特安設一臺再於喀喇烏蘇安設一臺於文報馳送旣便馬亦無庸另添得旨甚好如所議行○癸亥飭八旗勤習騎射○乙丑吏部議准陝西巡撫鍾音奏陝省榆葭道所轄僅榆林府屬五州縣且與知府同駐一城其員缺可裁請卽歸併延綏道轄改爲延榆綏道移駐榆林府再該道舊轄鄜州所屬洛川中部宜君三縣距省較近請改歸糧道轄從之○庚午賜哈薩克阿布勒巴木比特阿布資阿布勒比斯哈木巴巴使臣敕諭曰哈薩克阿布勒巴木比特阿布資阿布勒比斯哈木巴巴等爾等遣請朕安之瑚圖拜阿塔齊等由駐紮烏魯木齊大臣護送來京朕召見奏對後加恩宴賚賜爾等蟒錦段匹紬綾器什若干其各

祇受又賜來使等頂朝冠服朝珠銀段器物各有差仍俾護歸逆
牧據爾等使人奏稱厄魯特之地見俱閒曠今阿布勒比斯屬人
唐古塔爾見在巴爾魯克納喇巴圖在特穆爾淖爾渾哈爾克等
部落屬人額森克勒德卓羅木巴特在塔爾巴哈台圖魯木拜屬
人扎喇勒噶布在阿勒坦額默勒哈喇塔拉庫克烏蘇居住又想
朕加恩將來准哈薩克人等至伊犁遊牧等語塔爾巴哈台等處
向屬準噶爾遊牧朕以大兵平定爾哈薩克及布魯特塔什干安
集延巴達克山俱輸誠內附爾哈薩克遊牧頗屬寬廣理宜守其
舊界不可妄思踰越爾等若謂爲朕臣僕便可越境遊牧則布魯
特等亦皆朕臣僕各以遊牧爲請豈有大兵平定之地而分給眾
人之理見在伊犁等處內地官兵陸續移往屯駐故爾阿布賽前
經懇請於塔爾巴哈台等處遊牧朕未允行今豈得遽行專擅且

從前準噶爾恃強爭奪爾等尙不敢近其邊界朕平定伊犁始得各安生業尙可不知足耶至伊犁將軍大臣等於此等邊地不時遣兵巡察若見爾等屬人棲止或行驅逐或竟行俘獲則反致失其生業非朕撫恤爾等之初心也爾等內附有年諸凡恭順或爾所屬無知之人私往遊牧卽當明白曉諭令其移回故地方足以昭誠悃又來使等所奏布魯特等搶掠爾部情節其意蓋欲藉兵報復朕爲天下共主外藩諸部一視同仁儻不遵法紀致干罪戾者必遣兵往討若彼此小有爭鬭盜竊自當準情酌理務得其平豈可偏聽一面之詞遽興師旅昨巴達克山素勒坦沙曾擒斬逆回自效因請兵往勦鄰部朕未嘗允行爾等應亦聞知且朕若發兵助爾等而布魯特復來請兵亦將與之否乎夫盜竊之事邊界時有能彼此教戒屬人勿貪小利而傷和好斯爲安生之善策耳

將來布魯特有使至朕亦以此諭之再從前爾等部落貿易之人
有謂內地商人貨物不佳價復昂貴未行交易者夫烏嚕木齊貿
易之舉特念爾部難得內地之物故招募商販遠行交易期有益
爾等日用耳或商貨不能精好全備諭令善爲購辦尙屬可行若
價值則在交易之人因物計算貴賤隨時未便官爲減損其或彼
此不願亦難以相強也至去年爾部巴魯克巴圖魯等搶掠烏梁
海爾霍集伯爾根之姪托科洛被獲詢係隨母往探親戚非同來
搶掠之人因令使人等領回卽交與伊叔仍以格外加恩之意曉
示至巴魯克巴圖魯罪應致討北路將軍大臣卽欲發兵朕以爾
等恭順有年不欲以一人而驚擾全部因遣侍衛納旺齋敕往諭
爾等應使巴魯克巴圖魯服罪將從前掠獲逐一查還尙可曲爲
矜宥此時自必遵旨辦理俾納旺復命矣爾等果能懷仁向化惟

約束所部各守疆域以安生理庶可仰承朕恩常享無窮之福
○辛未諭軍機大臣等哈薩克使人瑚圖拜阿塔賚等奏稱厄魯特
之地見俱閒曠我哈薩克人等有在塔爾巴哈台庫克烏蘇綽爾
渾巴爾魯克阿勒坦額默勒等處駐牧者我等皆天朝臣僕懇恩
准至伊犁遊牧等語從前阿布賚請於塔爾巴哈台等處遊牧曾
經降旨曉諭今據來使所奏則伊等已漸穴闢入自當驅逐見在
頒給敕諭不允所請著傳諭阿桂等暫停按捕瑪哈沁以巡察邊
界爲由領兵四五百名前往塔爾巴哈台等處遇有哈薩克人等
在彼駐牧者卽明切曉示云此天朝平定之地爾頭目等從前奏
請遊牧大皇帝並未允行何得擅行棲止因念爾等旣經歸附姑
寬治罪可卽速遷徙伊等如果及時移出則已或有竟推諉遲延
卽應懾以軍威但不得遽行縱兵俘獲阿桂一切可相機妥協辦

理此行兵數不宜太少儻不敷用卽合之安泰所領兵又得四五百名可以號稱二千其如何與安泰寄信會兵並約計休息馬匹二十日一同起行之處俱著酌議奏聞

六月癸酉朔命直省實力捕蝗○參贊大臣阿里袞奏奉到諭旨令派人看守回部舊和卓木墳墓隨宣示各回人無不感激頂禮當委提督董孟公茂薩等查辦據稱回部喀什噶爾舊和卓木墳墓原有三十帕特瑪地畝錢糧看守回人十二戶仍照舊管理以供祭祀修葺餘爲伊等養贍報聞○乙亥命甘肅免徵本年及來年耗羨銀兩○丙子諭軍機大臣等刑部議駁吳士功條奏械閼案件請分別戶族強弱辦理一摺部臣所見甚是已降旨依議閼省地處海濱民風刁悍聚眾械鬪最爲向來惡俗該撫身任封疆正當執法鋤奸務在安善良而移風俗乃欲將族大族小分立科

條使械齷齪者得以趨避其詞而司讞者因而高下其手是欲博秀
頑之浮譽而不知守弼教之常經法司所指伊尚能置喙乎吳士
功自任巡撫以來辦理事件時落沾名習氣非明切劘示恐日久
竟成銅疾悔之已晚試思朕慎持國憲臣工內有能假條奏敷陳
巧爲嘗試者耶著將此傳諭該撫令其刻自提撕慎毋故智復萌
自貽伊戚○庚辰諭郡縣之外復設衛所原以所轄多係軍籍然
在有漕之地清軍督運尚有所司而各衛之無漕政者本朝定制
從無徵調諸役則名雖軍而實卽民所理仍皆州縣之事乃充是
任者向例率用武途中不勝營缺之人以委庸武弁而膺民社必
多貽誤月選牧令必經九卿詳加驗看引見時朕尚覈其才品如
行補放而猥以庸劣武夫寄同百里欲望其有益民生克稱吏職
豈可得耶卽如今日方觀承所參捕蝗不力之延慶衛守備褚延

章亦可略見一斑矣此等衛缺莫如量爲數汰設立州縣以專責
成著吏兵二部公同詳查會議將各衛之無漕政者逐一分別或
應改隸附近州縣或疆里較廣應另設州縣一併詳悉定議具奏
○甲申吏部以革職太常寺卿黃登賢遺缺請閒得旨黃登賢前
因班後憩坐交部議處自有應得處分卽使部議革職原可從寬
留任其罪不至竟行罷斥如果情罪重大無可輕恕者卽降旨革
職拏問何所不可而黃登賢所謂儀節之過非大罪也乃今日閱
看吏部本內有太常寺卿開缺請簡一本究問其故始知前此部
議革職進本時奏事太監錯誤遺漏初未呈覽見已查明重懲黃
登賢著革職從寬仍留原任以示朕不遂非○戊子調永貢爲倉
場侍郎以常鈞爲刑部侍郎由副都御史遷○己丑諭軍機大臣等江蘇
錢穀殷繁布政使一員專司總匯文案委積日給不遑卽在敘幹

之材尙虞顧此失彼慮年虛牘相因不能依限釐剔未必不由於此因思見在安徽布政使隨督臣駐紮江南所辦仍屬上江事件文移往返不免需時而親臨地方各員又非其專轄於封疆體制尙未允協若將安徽藩司仍回駐安慶而於江蘇增設藩司一員卽駐紮江南以江南之蘇松常鎮等處江南及江北之淮揚徐通海等處所屬地方酌量分隸管轄職分則事易集一切政務自可從容就理所有區別府屬及衙署養廉官吏經費各事宜應如何通融定制之處著尹繼善陳宏謀高晉等會同悉心妥議具奏到日俟朕明降諭旨○以蔣炳爲倉場侍郎由甘肅布政使遷○辛丑諭軍機大臣等海明等奏葉爾羌伯克等謂鄂對不宜爲阿奇木伯克懇請以額敏和卓補授隨咨商舒赫德傳集伊什罕阿布都喇伊木等嚴行申飭將呈擲還等語舒赫德指示海明所辦甚是但所

遞呈詞阿琿列名於前而伊什罕噶爾納齊等皆在後阿琿乃回人內誦經識字者與準噶爾喇嘛相似從前厄魯特等不知事體聽信喇嘛致生變亂豈可使回人因仍舊習著傳諭舒赫德等曉示各城回人嗣後諸事惟聽阿奇木伯克等辦理阿琿不得干與至舒赫德諳練有年於新柱海明等務宜詳加指示不得因各有分駐之地遂生推諉並傳諭新柱海明等知之○准貴州酌買雲南銅斤開鑄鑄錢○葉爾羌辦事都統海明等奏五月二十五日據裕拉哩克卡上送到巴勒提貿易人等據稱我等係頭目默默斯帕爾烏蘇完兩處遣來貿易我等兩部落相隔一河各有八千餘人西接克什密爾又西接痕都斯坦南接哈普倫東接土伯特北接博羅爾兩部落結姻中間亦曾爭鬪仍歸和好向來在葉爾羌貿易今聞天朝大兵平定回部各城是以欣悅願來歸附等

語因呈獻兩頭目書禮臣等加以撫慰查所攜貨物無多以初次
前來免其納稅並酌給口糧回人等俱感激叩首俟貿易事竣護
出邊卡報聞